

欽定北史

卷十
十一
四

北史卷十一

唐

李

延

壽

撰

隋本紀上第十一

隋高祖文皇帝姓楊氏諱堅小名那羅延本弘農華陰人漢太尉震之十四世孫也震八世孫燕北平太守鉉鉉子元壽魏初爲武川鎮司馬因家于神武樹頽焉元壽生太原太守惠嘏嘏生平原太守烈烈生寧遠將軍禎禎生皇考忠初禎屬魏末喪亂避地中山結義徒以討鮮于修禮遂死之周保定中皇考著勲追贈柱國大將軍少保興城郡公皇考美鬚髯身長七尺八寸狀貌

瓌偉武藝絕倫識量深重有將率之略年十八客遊泰山會梁兵陷郡國沒江南及北海王元顥入洛乃與俱歸顥敗弑朱度律召爲帳下統軍後從獨孤信屢有軍功又與信從魏孝武西遷東魏荊州刺史辛纂據穰城皇考從信討之與都督康洛兒元長生乘城而入彎弓大呼斬纂以徇城中懾服居半歲以東魏之逼與信俱歸周文帝召居帳下嘗從周文狩於龍門皇考獨當一猛獸左挾其腰右拔其舌周文壯之北臺謂猛獸爲揜于因以字之從禽寶泰破沙苑陣封襄武縣公河橋之役皇考與壯士五人力戰守橋敵人不敢進又與李遠

破黑水稽胡并與怡峯解玉壁圍以功歷雲洛二州刺史芒山之戰先登陷陣除大都督及侯景度江梁氏喪敗周文將經略乃授皇考都督荆等十五州諸軍事鎮穰城梁雍州刺史岳陽王蕭詧雖曰稱藩而猶懷貳心皇考自樊城觀兵漢濱易旗遞進實二千騎詧登樓望之以爲三萬懼而服焉又攻梁隨郡剋之獲其守桓和所過城戍望風請服進圍安陸梁司州刺史柳仲禮恐安陸不守馳歸赴援諸將恐仲禮至則安陸難下情急攻之皇考曰仲禮已在近路吾以奇兵襲之一舉必剋則安陸不攻自拔諸城可傳檄而定於是選騎二千街

枚夜進遇仲禮於漂頭禽之悉俘其衆安陸竟陵並降
梁元帝大懼送子方略爲質并送載書請魏以石城爲
限梁以安陸爲界皇考乃旋師進爵陳留郡公位大將
軍十七年梁元帝逼其兄邵陵王綸送質於齊欲來寇
梁元帝密報周文遣皇考討之禽綸數其罪殺之初皇
考禽柳仲禮遇之甚厚仲禮至京反譖皇考言在軍大
取金寶周文以皇考功重不問然皇考悔不殺仲禮故
至此殺綸皇考間歲再舉盡定漢東地甚得新附心魏
恭帝賜姓普六茹氏行同州事及于謹伐江陵皇考爲
前軍屯江津遏其走路梁人束刃於象鼻以戰皇考射

之二象反走江陵平周文立蕭譽爲梁主令皇考鎮穰城周孝閔踐祚入爲小宗伯及司馬消難請降皇考與柱國達奚武援之入齊境五百里前後遣三使報消難皆不反命及去北豫州三十里武疑有變欲還皇考曰有進死無退生獨以千騎夜趣城下候門開而入乃馳遣召武時齊鎮城伏敬遠勒甲士三千據東陴舉烽嚴警武憚之不欲保城乃多取財寶以消難先歸皇考以三千騎殿到洛南皆解鞍而臥齊衆來追至於洛北皇考謂將士曰但飽食今在死地賊必不敢度水食畢齊兵陽若度水皇考馳將擊之齊兵不敢逼遂徐引而還

武歎曰達奚武自言是天下健兒今日服矣進位柱國大將軍武成元年進封隋國公邑萬戶別食竟陵縣一千戶收其租賦保定二年爲大司空時朝議與突厥伐齊公卿咸以齊兵強國富斛律明月不易可當兵非十萬衆不可皇考獨曰萬騎足矣明月豎子亦何能爲三年乃以皇考爲元帥大將軍楊纂李穆王傑尔朱敏及開府元壽田弘慕容近等皆隸焉又令達奚武帥步騎三萬自南道進期會晉陽皇考乃留敏據什賁游兵河上皇考出武川過故宅祭先人饗將士席卷二十餘城齊人守陁嶺之隘皇考縱奇兵大破之留楊纂屯靈丘

爲後拒突厥木杆可汗控地頭可汗步離可汗等以十萬騎來會

四年正月朔攻晉陽時大雪風寒齊人乃悉其精銳鼓譟而出突厥引上西山不肯戰衆失色皇考乃率七百人步戰死者十四五以武後期乃班師齊人亦不敢逼突厥乃縱兵大掠自晉陽至平城七百餘里人畜無遺周武帝拜皇考爲太傅晉公護以其不附己以爲涇州總管是歲大軍又東伐晉公護出洛陽令皇考出沃野以應接突厥時軍糧少諸將憂之皇考曰當獲以濟事耳乃招誘稽胡首領咸令在坐使王傑盛軍容鳴鼓而

出皇考陽怪問之傑曰大家宰已至洛陽天子聞銀夏間胡擾動故使傑就攻除之又令突厥使者馳告曰可汗更入并州留兵馬十萬在長城下故令問公若有稽胡不服欲來共破之坐者皆懼皇考慰諭遣之於是歸命饋輸填積屬晉公護先退皇考亦罷兵而還鎮又以政績稱詔賜錢三十萬布五百匹穀二千斛以疾還京周武及晉公護屢臨視焉薨贈太保都督同朔等十三州軍事同州刺史本官如故諡曰桓公開皇元年追尊爲武元皇帝廟號太祖帝武元皇帝之長子也皇妣曰呂氏以周大統七年六月癸丑夜生帝於馮翊波若寺

有紫氣克庭時有尼來自河東謂皇妣曰此兒所從來甚異不可於俗間處之乃將帝舍於別館躬自撫養皇妣抱帝忽見頭上出角徧體起鱗墜帝于地尼自外見曰已驚我兒致令晚得天下帝龍領額上有五柱入頂目光外射有文在手曰王字長上短下沉深嚴重初入太學雖至親昵不敢狎也年十四京兆尹薛善辟爲功曹十五以皇考勲授散騎常侍車騎大將軍儀同三司封成紀縣公十六遷驃騎大將軍加開府周文帝見而歎曰此兒風骨非世間人明帝卽位授右小宗伯進封大興郡公明帝嘗遣善相者來和視帝和詭對曰不過

柱國旣而私謂帝曰公當爲天下君必大誅殺而後定周武帝卽位遷小宗伯出爲隨州刺史進位大將軍後徵還遇皇妣寢疾三年晝夜不離左右以純孝稱宇文護執政尤忌帝屢將害焉賴大將軍侯伏侯壽等救護以免後襲爵隋國公周武旣爲皇太子聘帝長女爲妃益加禮重齊王憲言於周武曰普六茹堅相貌臣每見之不覺自失恐非人下請早除之周武曰此止可爲將耳內史王軌驟諫曰皇太子非社稷主普六茹堅有反相周武不悅曰必天命將若之何帝甚懼深自晦匿後從周武平齊進柱國又與齊王憲破齊任城王湝於冀

州除定州總管先是州城門久閉不行齊人白文宣時
或請開之文宣不許曰當有聖人啓之及帝至而開之
莫不驚異遷亳州總管周宣帝卽位以后父人拜上柱
國大司馬大象初遷大後丞右司武俄轉大前疑周宣
每巡幸恒委以居守時周宣爲刑經聖制其法深刻帝
以法令滋章非興化之道切諫不納帝位望益隆周宣
頗以爲忌時周宣四幸女並爲皇后爭寵相毀周宣每
謂后曰必族滅爾家因召帝命左右曰若色動卽殺之
帝容色自若遂免大象二年五月以帝爲揚州總管將
發暴足疾而止乙未周宣不忿時靜帝幼冲前內史上

大夫鄭譯御正大夫劉昉以帝皇后之父衆望所集遂
矯詔引帝入侍疾因受遺輔政都督內外諸軍事帝恐
周武諸王在藩生變稱趙王招將嫁女於突厥爲詞以
徵之己酉周宣崩庚戌靜帝詔假黃鉞左大丞相百官
總已而聽焉以正陽宮爲丞相府以鄭譯爲長史劉昉
爲司馬具置寮佐周宣時刑政峻酷者悉更以寬大之
制天下歸心矣六月趙王招陳王純越王達代王盛滕
王道並至長安相州總管尉遲迥自以宿將至是不能
平遂舉兵趙魏之士響應旬日間衆至十餘萬宇文胄
以滎州石碯以建州席毗以沛郡毗弟義羅以兗州皆

應迴遣子質於陳以求援帝命上柱國鄖公韋孝寬討之雍州牧畢王賢及趙陳等五王謀作亂帝執賢斬之而掩趙王等罪因詔五王劔履上殿入朝不趨以安之時五王陰謀滋甚帝以酒肴造趙王觀其指趙王伏甲於臥內帝賴元胄以免於是誅趙越二王八月庚午韋孝寬破尉遲迴斬之傳首關下餘黨悉平初迴之亂鄖州總管司馬消難據州應迴淮南州縣多從之襄州總管王誼討之消難奔陳荆郢羣蠻乘釁而起命亳州總管賀若誼討平之先是上柱國王謙爲益州總管亦擁衆巴蜀以匡復爲辭帝以東夏山南爲事未遑致討謙

遂屯劔口陷始州至是乃命上柱國梁睿討平之傳首
闕下墜劔閣之險以絕好亂之萌焉九月壬子周帝進
帝大丞相十月周帝詔追贈皇曾祖烈爲柱國大保都
督十州諸軍事徐州刺史隋國公諡曰康皇祖禎爲柱
國都督十三州諸軍事同州刺史隋國公諡曰獻皇考
忠爲上柱國太師大冢宰都督十三州諸軍事雍州牧
壬戌誅陳王純周帝進帝大冢宰五府總於天官十一
月辛未誅代王達滕王迥十二月甲子周帝授帝相國
總百揆去都督內外諸軍事大冢宰之號進爵爲王以
隋州之崇業鄖州之安陸城陽溫州之宜人應州之平

靖上明順州之淮南士州之永川昌州之廣昌安昌申
州之義陽淮安息州之新蔡建安豫州之汝南臨潁廣
寧初安蔡州之蔡陽郢州之漢東二十郡爲隋國劔履
上殿入朝不趨贊拜不名備九錫之禮加璽紱遠游冠
相國印綠綬綬位在諸侯王上隋國置丞相以下一依
舊式帝再讓乃授王爵十郡而已周帝詔進皇祖皇考
爵並爲王夫人爲王妃

大定元年二月壬子下令曰以前賜姓皆復其舊甲寅
帝受九錫之禮景辰周帝又詔帝冕十有二旒建天子
旌旗出警入蹕乘金根車駕六馬備五時副車置旄頭

雲罕樂舞八佾設鍾簋宮縣王妃爲王后世子爲太子
前後三讓乃受俄而下詔依唐虞漢魏故事帝三讓不
許乃遣太傅上柱國杞國公椿奉冊曰咨爾相國隋王
粵若上古之初爰啓清濁降符授聖爲天下君事上帝
而理兆庶和百靈而利萬物非以區寓之富未以宸極
爲尊大庭軒轅以前驪連赫胥之日咸以無爲無欲不
將不迎遐哉其詳不可聞已厥有載籍遺文可觀聖莫
逾於堯美未過於舜堯得太尉已作運衡之篇舜遇司
空便叙菁華之竭褰裳脫屣二宮設饗百官歸禹若帝
之初斯蓋上則天時不敢不授下祇天命不敢不受湯

代於夏武革於殷干戈揖讓雖復異揆應天順人其道
靡異自漢迄晉有魏至周天曆逐獄訟之歸神鼎隨謳
歌之去道高者稱帝祿盡者不王與夫文祖神宗無以
別也周德將盡禍難頻興宗戚姦回成將竊發顧瞻宮
闕將圖宗社藩維連率逆亂相尋搖蕩三方不合如礪
蛇行鳥攫投足無所王受天明命叡德在躬救頽運之
艱匡墜地之業援大川之溺救燎原之火除羣凶於城
社廓祆氛於遠服至德合於造化神用洽於天壤八極
九野萬方四裔圓首方足莫不樂推往歲長星夜掃經
天晝見八風比夏后之作五緯同漢帝之聚除舊之徵

昭然在上近者赤雀降祉玄龜効靈鍾石變音蛟魚出
穴有新之貺煥焉在下九區歸往百靈協贊人神屬望
我不獨知仰祇皇靈俯順人願敬以帝位禪於爾躬天
祚告窮天祿永終於戲王其允執厥和儀刑典訓升圓
丘而敬蒼昊御皇極而撫黔黎副率土之心恢無疆之
祚可不盛歟遣大宗伯大將軍金城公趙襲奉皇帝璽
紱百官勸進帝乃受焉

開皇元年春二月甲子自相府常服入宮備禮卽皇帝
位於臨光殿設壇於南郊遣兼太傅上柱國鄧公竇熾
柴燎告天是日告廟大赦改元京師慶雲見改周官依

漢魏之舊制以相國司馬高頴爲尚書左僕射兼納言
相國司錄虞慶則爲內史監兼吏部尚書相國內郎李
德林爲內史令上開府韋世康爲禮部尚書上開府元
暉爲都官尚書開府戶部尚書元巖爲兵部尚書上儀
同司宗長孫毗爲工部尚書上儀同司會楊尚希爲度
支尚書雍州牧楊惠爲左衛大將軍乙丑追尊皇考爲
武元皇帝廟號太祖皇妣呂氏爲元明皇后改周氏左
社右廟制爲右社左廟遣八使巡省風俗景寅修廟社
立王后獨孤氏爲皇后王太子勇爲皇太子丁卯以大
將軍趙瑁爲尚書右僕射以上開府伊婁彥恭爲右武

侯大將軍己巳以五千戶封周帝介國公爲隋室賓旌
旗車服禮樂一如其舊上書不爲表答表不稱詔周氏
諸王盡降爲公辛未以皇弟同安郡公爽爲雍州牧乙
亥封皇弟邵國公慧爲滕王同安公爽爲衛王皇子鴈
門公爲晉王俊爲秦王秀爲越王諒爲漢王井州總管
李穆爲太師上柱國竇熾爲太傅幽州總管于翼爲太
尉觀國公田仁恭爲太子太師武德郡公柳敏爲太子
太保丁丑以晉王廣爲井州總管封陳留郡公智積爲
蔡王興城郡公靜爲道王戊寅改東京府爲尚書省發
官牛五千頭分賜貧人三月宣仁門槐樹連理衆枝內

附壬午白狼國獻方物丁亥詔犬馬器翫口味不得獻
上戊子苑山澤禁己丑移墊屋連理樹植于宮庭戊戌
以太子少保蘇威兼納言吏部尚書庚子詔前代品爵
悉依舊定丁未梁蕭巖使其太宰蕭巖來賀夏四月辛
巳大赦戊戌太常散樂並免爲編戶禁雜樂百戲辛丑
陳人來聘于周至而上己受禪致之介國是月發稽胡
修築長城二旬而罷五月戊午封邗國公楊雄爲廣平
王永康郡公楊弘爲河間王辛未介公薨上舉哀於朝
堂諡曰周靜帝六月癸未詔以初受命赤雀降祥推五
德相生爲火色其郊及社廟依服冕之儀而朝會之服

旗幟犧牲盡尚赤戎服尚黃秋七月乙卯上始服黃百
寮畢賀八月壬午廢東京官甲午遣樂安公元諧擊吐
谷渾於青海破而降之九月戊申遣使振給戰亡者家
庚午陳將周羅暉攻陷胡墅蕭摩訶寇江北辛未以越
王秀爲益州總管改封蜀王壬申以薛公長孫覽宋安
公元景山並爲行軍元帥伐陳仍令尚書左僕射高潁
節度諸軍是月行五銖錢冬十月乙酉百濟王扶餘昌
遣使來賀授昌上開府儀同三司帶方郡公戊子行新
律壬辰行幸岐州十一月乙卯以永富郡公竇榮定爲
右武侯大將軍遣兼散騎侍郎鄭摛使於陳己巳有流

星如墜牆光照于地十二月甲申以禮部尚書韋世康爲吏部尚書庚子至自岐州壬寅高麗王高陽遣使朝貢授陽大將軍遼東郡公太子太保柳敏卒是歲靺鞨突厥阿波可汗沙鉢略可汗並遣使朝貢

二年春正月庚申陳宣帝殂辛酉置河北道行臺尚書省於并州以晉王廣爲尚書令置河南道行臺尚書省於洛州以秦王俊爲尚書令置西南道行臺尚書省於益州以蜀王秀爲尚書令戊辰陳人遣使請和求歸胡墅甲戌詔舉賢良二月己丑詔以陳有喪命高頴等班師庚寅加晉王廣左武衛大將軍秦王俊右武衛大將

軍庚子京師雨土三月初命入宮殿門通籍戊申開渠引杜陽水於三時原夏四月丁丑以寧州刺史竇榮定爲左武侯大將軍庚寅大將軍韓僧壽破突厥於鷄頭山上柱國李克破突厥於河北山五月戊申以上開府長孫平爲度支尚書己酉以旱故上親省囚徒其日大雨己未高寶寧寇平州突厥入長城庚申以豫州刺史皇甫績爲都官尚書甲子改傳國璽曰受命璽丁卯制人年六十以上免課六月壬午以太府卿蘇孝慈爲兵部尚書甲申使弔於陳乙酉上柱國李克破突厥于馬邑景申詔曰朕祇奉上玄君臨萬國屬生靈之弊處

前代之宮以爲作之者勞居之者逸改創之事心未遑也而王公大臣陳謀獻策咸云義農以降至于姬劉有當世而屢遷無革命而不徙曹馬之後時見因循乃末世之宴安非往聖之宏義此城從漢彫殘日久屢爲戰場舊經喪亂今之宮室近代權宜又非謀筮從龜瞻星揆日不足建皇王之邑合大衆所聚論變通之數具幽顯之情同心固請詞情深切然則京師百官之府四海歸向非朕一人之所獨有苟利於物其可違乎且殷之五遷恐人盡怨是則以吉凶之土制長短之命謀新去故如農望秋雖則劬勞其究安宅今區寓寧一陰陽順

序安安以遷勿懷胥怨龍首山川原秀麗卉物滋阜卜
食相土宜建都邑定鼎之基永固無窮之業在斯公私
府宅規模遠近營構資須隨事修葺仍詔左僕射高頴
將作大匠劉龍鉅鹿郡公賀婁子幹太府少卿高龍義
等創造新都秋七月癸巳詔新置都處墳墓令悉遷葬
設祭仍給人功無主者命官爲殯葬甲午行新令冬十
月以撤毀故徙居東宮給內外官人祿癸酉皇太子勇
屯兵咸陽以備胡虜庚寅上疾愈享百寮於觀德殿賜
錢帛皆任自取盡力以出辛卯以營新都副監賀婁子
幹爲工部尚書十一月景午初命爲方陣戰法及制軍

營圖樣下諸軍府以擬征突厥十二月辛未上講武于後園甲戌上柱國竇毅卒景子名新都曰大興城乙酉遣彭城公虞慶則屯弘化以備胡突厥寇周槃行軍總管達奚長儒爲虜所敗景戌賜國子生經明者束帛丁亥親錄囚徒是歲高麗百濟並遣使朝貢

三年春正月庚子將遷新都大赦禁大刀長稍始令人以二十一成丁歲役功不過二十日不役者收庸廢遠近酒坊罷鹽井禁二月己巳朔日有蝕之癸酉陳人來聘突厥犯邊癸未以左武衛大將軍李禮成爲右武衛大將軍三月丁未上柱國鮮虞縣公謝慶恩卒景辰以

雨故常服入新都京師承明里醴泉出丁巳詔購遺書
於天下癸亥城榆關夏四月己巳衛王爽大破突厥於
白道山停築原陽雲內紫河等鎮而還上柱國建平郡
公于義卒庚午吐谷渾寇臨洮洮州刺史皮子信死之
壬申以尚書右僕射趙蕘兼內史令丁丑以滕王瓚爲
雍州牧庚辰行軍總管陰壽大破高寶寧于黃龍甲申
以旱故上親祀雨師景戌詔天下勸學行禮己丑陳郢
州城主張子譏遣使請降上以和好不納辛卯遣兼散
騎常侍薛舒聘於陳癸巳上親雩五月癸卯太尉任城
公子翼薨行軍總管李晃破突厥於摩那渡口乙巳梁

太子蕭琮來賀遷都辛酉親祀方澤壬戌行軍元帥竇
榮定破突厥及吐谷渾於涼州赦黃龍死罪以下六月
庚午封衛王爽子集爲遂安郡王戊寅突厥遣使求和
庚辰行軍總管梁遠破吐谷渾於爾汗山斬其名王秋
七月壬戌詔曰往者山東河表經此妖亂孤城遠守多
不自全濟陰太守杜猷身陷賊徒命懸寇手郡省事范
臺攻傾產營護免其戮辱眷言誠節實有可嘉宜超恒
賞用明沮勸臺攻可大都督假湘州刺史丁卯日有蝕
之八月壬午遣尚書右僕射高潁出寧州道吏部尚書
虞慶則出原州道並爲行軍元帥以擊胡戊子親祀太

社九月壬子幸城東觀穀稼癸丑大赦冬十月甲戌廢
河南道行臺省十一月發使巡省風俗庚辰陳人來聘
陳主知帝貌異世人使副使袁彥圖像而去甲午罷天
下諸郡十二月乙卯遣兼散騎常侍唐令則使於陳戊
午以刑部尚書蘇威爲戶部尚書是歲高麗突厥靺鞨
並遣使朝貢

四年春正月甲子朔日有蝕之祀太廟辛未祀南郊壬
申梁主蕭歸來朝甲戌大射於北苑十日而罷壬午齊
州水辛卯渝州獲獸似麋一角同蹄壬辰班新歷二月
乙巳上餞梁主于霸上庚戌行幸隴州突厥可汗阿史

那玷厥率其屬來降夏四月己亥勅總管刺史父母及子年十五以上不得將之官庚子以吏部尚書虞慶則爲尚書右僕射瀛州刺史楊尚希爲兵部尚書毛州刺史劉仁恩爲刑部尚書五月癸酉契丹主莫賀弗遣使請降拜大將軍六月庚子降囚徒壬子開通濟渠自渭達河以通運漕甲寅制官人非戰功不授上柱國以下戎官以雍同華岐宜五州旱命無出今年租調戊午秦王俊來朝秋七月景寅陳人來聘八月甲午遣十使巡省天下戊戌衛王爽來朝壬寅上柱國太傅鄧公竇熾薨乙卯陳將夏侯苗請降上以通和不納九月己巳上

親錄囚徒庚午契丹內附甲戌以關中饑行幸洛陽冬十一月壬戌遣兼散騎常侍薛道衡使於陳甲戌改周十二月爲臘蜡是歲靺鞨及女國並遣使朝貢

五年春正月戊辰詔行新禮壬申詔罷江陵總管其後梁主請依舊許之三月戊午以尚書左僕射高潁爲左領軍大將軍以上柱國宇文忻爲右領軍大將軍夏四月甲午契丹遣使朝貢壬寅上柱國王誼謀反誅乙卯詔徵山東大儒馬榮伯等戊申車駕至自洛陽五月甲申初置義倉梁主蕭巋殂遣上大將軍元契使于突厥阿波可汗秋七月庚申陳人來聘壬午突厥沙鉢略可

汗上表稱臣八月甲辰河南諸州水遣戶部尚書蘇威振給之戊申有流星數百四散而下九月乙丑改鮑陂曰杜陂霸水曰滋水景子遣兼散騎常侍李若使於陳冬十一月丁卯晉王廣來朝十二月丁未降囚徒

六年春正月甲子党項羌內附庚午班歷於突厥壬申使戶部尚書蘇威巡省山東二月乙酉山南荆浙七州水遣前工部尚書長孫毗振恤之景戌制刺史上佐每歲暮更入朝上考課丁亥發丁男十一萬修築長城二旬而罷庚子大赦三月己未洛陽男子高德上書請帝爲太上皇傳位皇太子帝曰朕承天命撫育蒼生日旰

孜孜猶恐不逮豈學近代帝王事不師古傳位於子自
求逸樂哉癸亥突厥沙鉢略可汗遣使朝貢夏四月己
亥陳人來聘秋七月辛亥河南諸州水乙丑京師雨毛
如馬尾長者二尺餘短者有六七寸八月辛卯關內七
州旱蠲其賦稅遣散騎常侍裴世豪使于陳戊申上柱
國太師申公李穆薨閏月丁卯皇太子鎮洛陽辛未晉
王廣秦王俊並來朝景子上柱國郟公梁士彥上柱國
杞公宇文忻柱國舒公劉昉謀反伏誅上柱國許公宇文
善有罪除名九月辛巳帝素服御射殿詔百寮射梁
士彥三家資物景戌上柱國宋安公元景山卒辛丑詔

振恤大象以來死事之家冬十月己酉以河北道行臺尚書令并州總管晉王廣爲雍州牧餘官如故以兵部尚書楊尚希爲禮部尚書癸丑置山南道行臺尚書省於襄州以秦王俊爲尚書令

七年春正月癸巳祀太廟乙未制諸州歲貢三人二月丁巳祀朝日於東郊己巳陳人來聘壬申幸醴泉宮是月發丁男十萬修築長城二旬而罷夏四月庚戌於揚州開山陽瀆以通運漕突厥沙鉢畧可汗卒癸亥頒青龍符於東方總管刺史西方以白武南方以朱雀北方以玄武甲戌遣兼散騎常侍楊周使于陳以戶部尚書

蘇威爲吏部尚書五月乙亥朔日有蝕之己卯隕石於武安滏陽間十餘里秋七月己丑衛王爽薨八月庚申梁主蕭琮來朝九月乙酉梁安平王蕭巖掠於其國以奔陳辛卯廢梁國曲赦江陵以梁主蕭琮爲柱國封莒國公冬十月庚申行幸同州以先帝所居故曲降囚徒癸亥幸蒲州景寅宴父老上極歡曰此間人物衣服鮮麗容止閑雅良由仕宦之鄉陶染成俗也十一月甲午幸馮翊祭故社父老對詔失旨上大怒免其縣官而去戊戌車駕至自馮翊

八年春正月乙亥陳人來聘二月辛酉陳人寇碭州三

月辛未上柱國隴西公李詢卒甲戌遣兼散騎常侍程尚賢使于陳戊寅詔大舉伐陳秋八月丁未河北諸州饑遣吏部尚書蘇威振恤之九月癸巳嘉州言龍見冬十月己未置淮南行臺省於壽春以晉王廣爲尚書令辛酉陳人來聘拘留不遣甲子有星孛於牽牛享太廟授律令晉王廣秦王俊清河公楊素並爲行軍元帥以伐陳於是晉王出六合秦王出襄陽清河公楊素出信州荊州刺史劉仁恩出江陵宜陽公王世積出蘄春新義公韓擒出廬江襄邑公賀若弼出吳州落叢公燕榮出東海合總管九十兵五十一萬八千皆受晉王節度

東接滄海西拒巴蜀旌旃舟楫橫亘數千里仍曲赦陳國十一月丁卯車駕餞師詔購陳叔寶位上柱國萬戶公乙亥行幸定城陳師誓衆景子幸河東十二月車駕至自河東

九年春正月癸酉以尚書左僕射虞慶則爲右衛大將軍景子賀若弼敗陳師於蔣山獲其將蕭摩訶韓擒進師入建鄴獲陳主叔寶陳國平合州四十郡一百縣四百戶五十萬口二百萬癸巳遣使持節巡撫之二月乙未廢淮南尚書省景申制五百家爲鄉正一人百家爲里長一人夏四月己亥幸驪山親勞旋師乙巳三軍凱

入獻俘於太廟以晉王廣爲太尉庚戌帝御廣陽門宴
將士頒賜各有差辛亥大赦以陳都官尚書孔範散騎
常侍王瑳王儀御史中丞沈觀等邪佞於其主以致亡
滅皆投之邊裔陳人普給復十年軍人畢世免徭役擢
陳之文武衆才而用之宮奴數千可歸者歸之其餘盡
以分賜將士及王公貴臣其資物皆於五梁賜王公以
下大射毀所得秦漢三大鍾越二大鼓又設亡陳女樂
謂公卿等曰此聲似帝朕聞之甚不喜故與公等一聽
亡國之音俱爲永鑒焉辛酉以吏部侍郎宇文弼爲刑
部尚書宗正卿楊昇爲工部尚書壬戌詔曰今率土大

同舍生遂性兵可立威不可不戢刑可助化不可專行
禁衛九重之餘鎮守四方之外戎旅軍器皆宜停罷武
力之子俱可學文人間甲杖悉皆除毀閏月丁丑頒木
魚符於總管刺史雌一雄三己卯以吏部尚書蘇威爲
尚書右僕射六月乙丑以荊州總管楊素爲納言丁卯
以吏部侍郎盧愷爲禮部尚書時羣臣咸請封禪詔不
許曰豈可命一將軍除一小國以薄德而封名山用虛
言而干上帝邪八月壬戌以廣平王雄爲司空冬十一
月壬辰考使定州刺史豆盧通等上表請封禪上不許
庚子以右衛大將軍虞慶則爲右武侯大將軍右領軍

將軍李安爲右領軍大將軍甲寅降囚徒十二月甲子
詔太常卿牛弘通直散騎常侍許善心祕書丞姚察通
直郎虞世基等議定樂

十年春正月乙未以皇孫昭爲河南王楷爲華陽王二
月庚申行幸并州夏五月乙未詔曰魏末喪亂寓縣瓜
分役軍歲動未遑休息兵士軍人權置坊府南征北伐
居處無定家無完堵地罕苞桑恒爲流寓之人竟無鄉
里之號朕甚愍之凡是軍人可悉屬州縣墾田藉帳一
同編戶軍府統領宜依舊式罷山東河南及北方緣邊
之地新置軍府六月辛酉制人年五十免役折庸秋七

月癸卯以納言楊素爲內史令庚戌上親錄囚徒辛亥
高麗遼東郡公高陽卒八月壬申遣柱國韋洸上開府
王景並持節巡撫嶺南百越皆服九月丁酉至自并州
冬十月甲子頒木魚符於京官五品以上十一月辛卯
幸國學頒賜各有差辛丑祀南郊是月婺州人汪文進
會稽人高智慧蘇州人沈玄愔皆舉兵反自稱天子樂
安蔡道人饒州吳世華永嘉沈孝徹泉州王國慶餘杭
楊寶英交趾李春等皆自稱大都督詔內史令楊素討
平之是歲吐谷渾契丹並遣使朝貢

十一年春正月丁酉以平陳所得古器多爲禍變悉命

毀之景午皇太子妃元氏薨上舉哀於東宮文思殿二月戊午以大將軍蘇孝慈爲工部尚書景子以臨穎令劉曠政績尤異擢爲莒州刺史辛巳晦日有蝕之夏五月乙巳以右衛將軍元旻爲左衛大將軍秋八月壬申滕王瓚薨乙亥上柱國沛國公鄭譯卒是歲高麗靺鞨並遣使朝貢突厥獻七寶盃

十二年春二月己巳以蜀王秀爲內史令兼右領軍大將軍以漢王諒爲雍州牧右衛大將軍秋七月乙巳尚書右僕射邳公蘇威禮部尚書容城侯盧愷並坐事除名壬申晦日有蝕之八月甲戌制天下死罪諸州不得

便決皆令大理覆之癸巳制宿衛者不得輒離所守丁酉上柱國楚公豆盧勣卒戊戌上親錄囚徒冬十月丁丑以遂安王集爲衛王壬午祀太廟至太祖神主前帝流涕嗚咽不自勝十一月辛亥祀南郊己未上柱國新義公韓擒卒甲子百寮大射於武德殿十二月乙酉以內史令楊素爲尚書右僕射是歲突厥吐谷渾靺鞨並遣使朝貢

十三年春正月乙巳上柱國郇公韓建業卒壬子祀感帝己未以信州總管韋世康爲吏部尚書壬戌行幸岐州二月景子詔營仁壽宮丁亥至自岐州己卯立皇孫

曠爲豫章王戊子晉州刺史南陽郡公賈悉達隰州總
管撫寧郡公韓延等以賄伏誅己丑制坐事去官者配
防一年丁酉制私家不得隱藏緯候圖讖夏五月癸亥
詔禁人間撰集國史臧否人物秋七月戊辰晦日有蝕
之九月景辰降囚徒庚申封邵公楊綸爲滕王冬十一
月乙卯上柱國華陰公梁彥光卒是歲契丹霄室韋靺
鞨並遣使朝貢

十四年夏四月乙丑詔曰比命有司總令研究正樂雅
聲詳定已訖宜卽施用見行者停人間音樂流僻日久
棄其舊體競造繁聲流宕不歸遂以成俗宜加禁約務

存其本五月辛酉京師地震關內諸州旱六月丁卯詔
省府州縣皆給廩田不得興生與人爭利秋七月乙未
以邳公蘇威爲納言八月辛未關中大旱人饑行幸洛
陽并命百姓山東就食冬閏十月甲寅詔曰梁齊陳往
皆創業一方綿歷年代旣宗祀廢絕祭奠無主興言矜
念良以愴然莒國公蕭琮及高仁英陳叔寶等宜令以
時世脩祭祀所須器物有司給之乙卯制外官九品以
上父母及子年十五不得從之官十一月壬戌制州縣
佐史三年一代不得重任癸未有星孛于角亢十二月
乙未東巡狩

十五年春正月壬戌車駕次齊州親問疾苦景寅旅王符山庚午以歲旱祀太山以謝愆咎大赦二月景辰禁私家畜兵器關中緣邊不在其例禁河以東無得乘馬丁巳上柱國蔣公梁睿卒三月己未車駕至自東巡望祭五嶽海瀆丁亥幸仁壽宮夏四月己丑朔大赦甲辰以趙州刺史楊達爲工部尚書五月丁亥制京官五品以上佩銅魚符六月戊子詔鑿砥柱庚寅相州刺史豆慮通貢綾文布命焚之于朝堂辛丑詔名山未在祀典者悉命祀之秋七月甲戌遣邳公蘇威巡省江南戊寅至自仁壽宮辛巳制九品以上官以理去官者並執聽

笏冬十二月戊子勅盜邊糧一升以上皆斬籍沒其家
己丑詔文武官以四考更代是歲吐谷渾林邑等國並
遣使朝貢

十六年春二月丁亥封皇孫裕爲平原王筠爲安成王
疑爲安平王恪爲襄城王該爲高陽王韶爲建安王暕
爲潁川王夏六月甲午制工商不得進仕并州大蝗辛
丑詔九品以上妻五品以上妾夫亡不得改嫁秋八月
庚戌詔決死罪者三奏而後行刑冬十月己丑幸長春
宮十一月壬子至自長春宮

十七年春二月癸未太平公史萬歲伐西寧剋之庚寅

行幸仁壽宮庚子上柱國王世積討桂州賊李光仕平
之三月景辰詔諸司屬官有犯聽於律令外斟酌決杖
辛酉上親錄囚徒癸亥上柱國彭城公劉昶以罪伏誅
庚午遣御史柳彧皇甫誕巡省河南北夏四月戊寅頒
新歷五月庚申宴百寮於玉女泉班賜各有差己巳蜀
王秀來朝閏月己卯羣鹿入殿門馴擾侍衛之內秋七
月丁丑桂州人李世賢反遣右武侯大將軍虞慶則討
平之丁亥并州總管秦王俊坐事免以王就第九月甲
申車駕至自仁壽宮庚寅上謂侍臣曰朝廷設樂本以
迎神齋祭之日觸目多感當此之際何可爲心在路奏

樂禮爲未允公卿宜更詳之冬十月丁未頒銅武符於
驃騎車騎府戊申道王靜薨庚午詔曰五帝異樂三王
殊禮皆隨事而有損益因情而立節文仰惟祭享宗廟
瞻敬如在罔極之感情深茲日而禮畢升路鼓吹發音
還入宮門金石振響斯則哀樂同日心事相違情所不
安理寔未允宜改茲往式用弘禮教自今享廟日不須
備鼓吹殿庭勿設樂縣辛未京下大索十二月壬子上
柱國右武侯大將軍魯公虞慶則以罪伏誅是歲高麗
突厥並遣使朝貢

十八年春正月辛丑詔曰吳越之人往承弊俗所在之

處私造大船因相聚結致有侵害江南諸州人間有船長三丈以上悉括入官二月甲辰幸仁壽宮乙巳以漢王諒爲行軍元帥水陸三十萬伐高麗夏五月辛亥詔畜猫鬼蠱毒厭魅野道之家投于四裔六月景寅詔黜高麗王高元官爵秋八月景子詔京官五品以上總管刺史舉志行修謹清平幹濟之士九月己丑漢王諒師遇疾疫而旋死者十二三庚寅勅舍客無公驗者坐及刺史縣令辛卯車駕至自仁壽宮冬十一月甲戌帝親錄囚徒癸未祀南郊十二月庚子上柱國夏州總管東萊公王景以罪伏誅是歲自京師至仁壽宮置行宮十

所杞宋陳亳曹戴頴等州水詔並免庸調

十九年春正月癸酉大赦戊寅大射于武德殿二月己亥晉王廣來朝甲寅幸仁壽宮夏四月丁酉突厥利可汗內附達頭可汗犯塞行軍總管史萬歲擊破之六月丁酉以豫章王暕爲內史令秋八月癸卯上柱國尚書左僕射齊公高潁坐事免辛亥上柱國皖城公張威卒甲寅上柱國城陽公李徹卒九月乙丑以太常卿牛弘爲吏部尚書冬十月甲午以突厥利可汗爲啓人可汗築大利城處其部落十一月有司言元年已來日漸長十二月乙未突厥都藍可汗爲部下所殺國大亂星隕

於勃海

二十年春正月辛酉朔突厥高麗契丹並遣使朝貢二月丁丑無雲而雷三月辛卯熙州人李英林反遣行軍總管張衡討之夏四月壬戌突厥犯塞以晉王廣爲行軍元帥擊破之乙亥天有聲如寫水自南而北六月丁丑秦王俊薨秋九月丁未車駕至自仁壽宮冬十月乙丑廢皇太子勇及其諸子並爲庶人殺柱國太平公史萬歲己巳殺左衛大將軍五原公元旻十一月戊子以晉王廣爲皇太子天下地震京城大風雪十二月戊午詔東宮官屬於皇太子不得稱臣辛巳詔毀壞偷盜佛

及天尊像嶽鎮海瀆神形者以不道論沙門壞佛像道士壞天尊像以惡逆論

仁壽元年春正月乙酉朔大赦改元以尚書右僕射楊素爲左僕射以納言蘇威爲右僕射丁酉徙河南王昭爲晉王突厥寇恒安遣柱國韓洪擊之敗焉以晉王昭爲內史令辛丑詔曰投生殉節自古稱難殞身王事禮加二等而世俗之徒不達大義致命戎旅不入兆域與言念此每深愍歎且入廟祭祀並不廢闕何止墳塋獨在其外自今戰亡之徒宜入墓域二月乙卯朔日有蝕之夏五月己丑突厥男女九萬餘口來降壬辰驟雨震

雷大風拔木宜君湫水移於始平六月乙卯遣十六使
巡省風俗乙丑廢大學及州縣學唯留國子一學取正
三品以上子七十二人克生頒舍利於諸州秋七月戊
戌改國子爲太學十一月己丑祀南郊十二月楊素擊
突厥大破之

二年春三月己亥幸仁壽宮夏四月庚戌岐雍二州地
震秋七月景戌詔內外官各舉所知八月己巳皇后獨
孤氏崩九月景戌車駕至自仁壽宮壬辰河南北諸州
大水遣工部尚書楊達振恤之乙未上柱國袁州總管
金水公周搖卒隴西地震冬十月壬子曲赦益州管內

癸丑以工部尚書楊達爲納言閏月甲申詔尚書左僕射楊素與諸術者刊定陰陽舛謬己丑詔楊素右僕射蘇威吏部尚書牛弘內史侍郎薛道衡祕書丞許善心內史舍人虞世基著作郎王劭等修定五禮壬寅葬獻皇后於太陵十二月癸巳益州總管蜀王秀有罪廢爲庶人交州人李佛子舉兵反遣行軍總管劉方討平之三年春二月戊子以大將軍蔡陽郡公姚辨爲左武侯大將軍夏五月癸卯詔曰六月十三日是朕生日其日令海內爲武元皇帝元明皇后斷屠六月甲午詔曰禮云親以朞斷蓋以四時之變易萬物之更始故聖人象

之其有三年加隆爾也但家無二尊母爲厭降是以父
在喪母還服于朞者服之正也豈容朞內而更小祥然
三年之喪而有小祥者禮云朞祭禮也朞而除喪道也
以是之故雖未再朞而天地一變不可不祭不可不除
故有練焉以存喪祭之本然朞喪有練於理未安雖云
十一月而練乃無所法象非朞非時豈可除祭而儒者
徒擬三年之喪立練禫之節可謂苟存其變而失其本
欲漸於奪乃薄於喪致使子則冠練去絰黃裏繚緣絰
則布葛在躬麤服未改豈非經衰尚存子情已奪親疎
失倫輕重顛倒乃不順人情豈聖人之意也故非先聖

之禮廢於人邪三年之喪尚有不行之者至於祥練之節安能不墜者乎禮云父母之喪無貴賤一也而大夫士之喪父母乃貴賤異服然則禮壞樂崩由來漸矣所以晏平仲之斬麤縗其老謂之非禮滕文公之服三年其臣咸所不欲蓋由王道旣衰諸侯異政將踰越於法度惡禮制之害已乃滅去篇籍自制其宜遂至骨肉之恩輕重從俗無易之道降殺任情夫禮不從天降不從地出乃人心而已者謂情緣於恩也故恩厚者其禮隆情輕者其禮殺聖人以是稱情立文別親疎貴賤之節自臣子道消上下失序莫大之恩遂情而薄莫重之化

與時而殺此乃服不稱喪容不稱服非所謂聖人緣恩表情制禮之義也然喪與其易也寧在於戚則禮之本也禮有其餘未若於哀則情之實也今十一月而練者非禮之本非情之實由是言之父在喪母不宜有練但依禮十三月而祥中月而禫庶以合聖人之意達人子之心秋七月丁卯詔州縣搜揚賢哲皆取明知古今通議安危究政教之本達禮樂之源不限多少不得不舉徵召將送必須以禮八月壬申上柱國檢校幽州總管落藁公燕榮以罪伏誅九月壬戌置常平官甲子以營州總管韋沖爲戶部尚書十二月癸酉河南諸州遣納

言楊達振恤之

四年春正月景辰大赦甲子幸仁壽宮夏四月乙卯上不豫六月庚午大赦有星入月中數日而退長人見於鴈門秋七月乙未日青無光八日乃復甲辰帝疾甚臥於仁壽宮與百寮辭訣上握手獻歎丁未崩于大寶殿時年六十四詔曰嗟乎自昔晉室播遷天下喪亂四海不一以至周齊戰爭相尋年將三百故割疆土者非一所稱帝王者非一人書軌不同生靈塗炭上天降監受命于朕用登大位豈關人力故得撥亂反正偃武修文天下大同聲教遠被此又是天意欲寧區夏所以昧且

臨朝不敢逸豫一日萬幾留心親覽晦明寒暑不憚劬勞匪曰朕躬蓋爲百姓故也王公卿士每日闕庭刺史以下歲時朝集何嘗不罄竭心府誠勅殷勤義乃君臣情兼父子庶藉百寮之智萬國歡心欲令率土之人永得安樂不謂邁疾彌留至於大漸此乃人生常分何足言及但四海百姓衣食不豐教化政刑猶未盡洽興言念此唯以留恨朕今踰六十不復稱夭但筋力精神一時勞竭如此之事本非爲身止欲安養百姓所以致此人生子孫誰不念愛旣爲天下事須割情勇及秀等並懷悖惡旣無臣子之心所以黜廢古人有云知臣莫若

君知子莫若父令勇秀得志共理家國亦當戮辱遍於公卿酷毒流於人庶今惡子孫已爲百姓黜屏好子孫足堪負荷大業此雖朕家事理不容隱前對文武侍衛具已論述皇太子廣地居上嗣仁孝著聞以其行業堪成朕志但念內外羣官同心勦力以此共安天下朕雖瞑目何所復恨國家大事不可限以常禮旣葬公除行之自昔今宜遵用不勞改定凶禮所須纔令周事務從節儉不得勞人諸州總管刺史以下宜率其職不須奔赴自古哲王因人作法前帝後帝沿革隨時律令格式有不便於事者宜依前修改務當政要嗚呼敬之哉無

墜朕命乙卯發喪河間楊柳四株無故黃落旣而花葉復生八月丁卯梓宮至自仁壽宮景子殯於大興前殿十月乙卯葬於太陵同墳而異穴士庶赴葬者皆聽入視陵內帝性嚴重有威容外質木而內明敏有大畧初得政之始羣情不附諸子幼弱內有六王之謀外致三方之亂握強兵居重鎮者皆周之舊臣上推以赤心各盡其用不踰期月剋定三邊未及十年平一四海薄賦歛輕刑罰內修制度外撫戎夷每旦聽朝日仄忘倦居處服翫務存節儉令行禁止上下化之開皇仁壽之間丈夫不衣綾綺而無金玉之飾常服率多布帛裝帶不

過以銅鐵骨角而已雖嗇於財至於賞賜有功亦無所
愛惜每乘輿四出路逢上表者駐馬親自臨問或潛遣
行人采聽風俗吏政得失人間疾苦無不留意嘗遇關
中饑遣左右視百姓所食有得豆屑雜糠而奏之者上
流涕以示羣臣深自咎責爲之損膳而不御酒肉者殆
將一期及東拜太山關中戶口就食洛陽者道路相屬
帝勅斥候不得輒有驅逼男女參廁於仗衛之間遇逢
扶老攜幼者輒引馬避之慰勉而去至艱險之處見負
擔者遽令左右扶助之其有將士戰歿必加優賞仍令
使者就家勞問自強不息朝夕孜孜人庶殷繁帑藏克

實雖未能致臻於至道亦足稱近代之良主然雅性沉
猜素無學術好爲小數言神燭聖杖堪能療病又信王
劭解石文以爲已瑞焉不達大體如是故忠臣義士莫
得盡心竭辭其草創元勲及有功諸將誅夷獲罪罕有
存者又不悅詩書楊素由之希旨遂奏除學校唯婦言
是用廢黜諸子逮于暮年持法尤峻喜怒失常果於殺
戮嘗令左右送西域朝貢使出關其所經之處受牧
宰小物饋鸚鵡麋皮馬鞭之屬聞而大怒又詣武庫見
署中蕪穢不理於是執武庫令及諸受遺者出開遠門
外親自臨決死者數十人又往往潛令賂遺令史府史

受者必死無所寬貸議者以此少之

論曰隋文帝樹基立本積德累仁徒以外戚之尊受託孤之任與能之議未有所許是以周室舊臣咸懷憤惋既而王謙固三蜀之阻不踰期月尉遲迥舉全齊之衆一戰而亡斯乃非止人謀抑亦天之所贊乘茲機運遂遷周鼎于時蠻夷猾夏荆揚未一劬勞日仄經營四方樓船南邁則金陵失險驃騎北指則單于歛塞職方所載並入疆理禹貢所圖咸受正朔雖晉武之克平吳會漢宣之推亡固存比義論功不能尚也七德旣敷九歌已洽尉候無警遐邇肅清於是躬節儉平徭賦倉廩實

法令行君子咸樂其生小人各安其業強不陵弱衆不
暴寡人物殷阜朝野歡娛自開皇二十年間天下無事
區宇之內晏如也考之前王足以參蹤盛烈而素無術
業不能盡下無寬仁之度有刻薄之資暨乎暮年此風
愈扇又雅好瑞符暗於大道建彼維城權侔京室皆同
帝制靡所適從聽妬婦之言惑邪臣之說溺寵廢嫡託
付失所滅父子之道開昆弟之隙縱其尋斧翦伐本根
墳土未乾子孫繼踵爲戮松檟纔列天下已非隋有惜
哉迹其衰怠之源稽其亂亡之兆起自文皇成於煬帝
所由來遠矣非一朝一夕其不祀忽諸未爲不幸也

北史卷十一

北史卷十一考證

隋高祖文皇帝紀四年正月朔攻晉陽○此周保定四年也從上文保定二年例不必另行今各本俱同姑仍之

明帝卽位授右小宗伯○宗隋書作宮

臣宗萬

按帝父

于孝閔時曾入爲小宗伯明帝之授俾襲先職耳隋書作宮伯疑誤

明帝嘗遣善相者來和視帝○來和隋書作趙昭本書煬皇帝紀高祖密令善相者來和徧視諸子則此殆因彼而訛也

先是州城門久閉不行○門字上隋書有西字

置旄頭雲罕○罕監本訛空今改從南本

廓祇氛於遠服○祇監本訛祓今改正

以上開府伊婁彥恭爲右武侯大將軍○候監本作侯
今從隋書改正

以永富郡公竇榮定爲右武侯大將軍○富隋書作昌
已已有流星如墜牆光照于地○流監本訛泣今改從
南本

乙酉遣彭城公虞慶則屯弘化以備胡○彭城周書作

沁源

乙卯詔徵山東大儒馬榮伯等○隋書作乙巳詔徵山

東馬榮伯等六儒

臣宗萬

按榮伯本傳云與張仲讓

孔籠竇仕榮張買奴劉祖仁等號爲六儒又熊安生
傳云有馬榮伯張黑奴竇士榮孔籠劉焯劉炫等皆
其門人仕榮作士榮買奴作黑奴未知孰是

庚午班歷於突厥○午監本訛子今據上甲子下壬申

改正

詔百寮射梁士彥三家資物○射字下隋書有賜字

閏月丁丑頒木魚符於總管刺史雌一雄三○三隋書

六月辛酉制人年五十免役折庸○折隋書作收

丁酉上柱國楚公豆盧勣卒○勣隋書作勣

上柱國郇公韓建業卒○建隋書作達

己丑制坐事去官者配防○防隋書作流

臣宗萬

按古

者置兵邊塞以備寇名曰防秋配防疑是遣戍而配
作防秋効力者

六月丁卯詔省府州縣皆給解田不得興生與人爭利

○興隋書作治

十二月庚子上柱國夏州總管東萊公王景以罪伏誅

○東萊隋書作任城

癸丑以工部尚書楊達爲納言○達監本誤達今從上
文河南北諸州大水遣工部尚書楊達振恤之改正
上天降監受命于朕○受一本作爰

北史卷十一考證

北史卷十二

唐

李

延

壽

撰

隋本紀下第十二

煬皇帝諱廣一名英小字阿摩高祖第二子也母曰文獻獨孤皇后上美姿儀少敏慧高祖及后於諸子中特所鍾愛在周以高祖勲封鴈門郡公開皇元年立爲晉王拜柱國并州總管時年十三尋授武衛大將軍進上柱國河北道行臺尙書令大將軍如故高祖令項城公歆安道公才李徹輔導之上好學善屬文沉深嚴重朝野屬望高祖密令善相者來和徧視諸子和曰晉王眉

上雙骨隆起貴不可言既而高祖幸上所居第見樂器絃多斷絕又有塵埃若不用者以爲不好聲妓之翫上尤自矯飾當時稱爲仁孝嘗觀獵遇雨左右進油衣上曰士卒皆霑濕我獨衣此乎乃令持去六年轉淮南道行臺尙書令其年徵拜雍州牧內史令八年冬大舉伐陳以上爲行軍元帥及陳平執陳湘州刺史施文慶散騎常侍沈客卿市令湯慧朗刑法監徐析尙書都令史暨慧以其邪佞有害於民斬之石闕下以謝三吳於是封府庫資財無所取天下稱賢進位太尉賜路車乘馬袞冕之服玄珪白璧各一雙復拜并州總管俄而江南

高智慧等相聚作亂徙上爲揚州總管鎮江都每歲一朝高祖之祠太山也領武侯大將軍明年歸藩後數載突厥寇邊復爲行軍元帥出靈武無虜而旋及太子勇廢立上爲皇太子是月當受冊高祖曰吾以大興公成帝業令上出舍大興其夜烈風大雪地震山崩民舍多壞壓死者百餘口仁壽初奉詔巡撫東南是後高祖每避暑仁壽宮恒令上監國四年七月高祖崩上卽皇帝位於仁壽宮八月奉梓宮還京師并州總管漢王諒舉兵反詔尙書左僕射楊素討平之九月乙巳以備身將軍崔彭爲左領軍大將軍十一月乙未幸洛陽景中發

丁男十數萬掘塹自龍門東接長平汲郡抵臨清關度
河至浚儀襄城達于上洛以置關防癸丑詔曰乾道變
化陰陽所以消息沿創不同生靈所以順序若使天意
不變施化何以成四時人事不易爲政何以利萬姓易
不云乎通其變使民不倦變則通通則久有德則可久
有功則可大朕又聞之安安而能遷民用丕變是故姬
邑兩周如武王之意殷人五徙成湯后之業若不因民
順天功業見乎變愛民治國者可不謂歟然雒邑自古
之都王畿之內天地之所合陰陽之所和控以三河固
以四塞水陸通貢賦等故漢祖曰吾行天下多矣唯見

雒陽自古皇王何嘗不留意所不都者蓋有由焉或以九州未一或以困其府庫作雒之制所以未暇也我有隋之始便欲創茲懷雒日復一日越暨于今念茲在茲興言感哽朕肅膺寶歷纂臨萬邦遵而不失心奉先志今者漢王諒悖逆毒被山東遂令州縣或淪非所由關河懸遠兵不赴急加以并州移戶復在河南周遷殷民意在於此況復南服遐遠東夏殷大因機順動今也其時羣司百辟僉諧厥議但成周墟堵弗堪胥宇今可於伊雒營建東京便卽設官分職以爲民極也夫宮室之制本以便生人上棟下宇足以避風露高臺廣厦豈日

適形故傳云儉德之恭侈惡之大宣尼有云與其不遜也寧儉豈謂瑤臺瓊室方爲宮殿者乎土堦采椽而非帝王者乎是知非天下以奉一人乃一人以主天下也民惟國本本固邦寧百姓足孰與不足今所營構務從節儉無令雕牆峻宇復起於當今欲使卑宮菲食將貽於後世有司明爲條格稱朕意焉十二月乙丑以右武衛將軍來護兒爲右驍衛大將軍戊辰以柱國李景爲右武衛大將軍以右衛率周羅暎爲右武侯大將軍大業元年春正月壬辰朔大赦改元立妃蕭氏爲皇后改豫州爲溱州洛州爲豫州廢諸州總管府景申立晉

王昭爲皇太子丁酉以上柱國宇文述爲左衛大將軍
上柱國郭衍爲左武衛大將軍延壽公于仲文爲右衛
大將軍己亥以豫章王暕爲豫州牧戊申發八使巡省
風俗下詔曰昔者哲王之理天下也其在愛民乎旣富
而教家給人足故能風教淳厚遠至邇安理定功成率
由斯道朕恭嗣寶位撫育黎獻夙夜戰兢若臨川谷雖
則聿遵先緒弗敢失墜永言政術多有缺然況以四海
之遠兆民之衆未獲親臨問其疾苦每慮幽仄莫舉寬
屈不申一物失所用傷和氣萬方有罪責在朕躬所以
興寤增歎而夕惕載懷者也今旣布政惟始宜存寬大

可分遣使人巡省方俗宣揚風化薦拔淹滯申達幽枉
孝悌力田給以優復鰥寡孤獨不能自存者量加振濟
義夫節婦旌表門閭高年之老加其板授並依別條賜
以粟帛篤疾之徒給侍丁者雖有侍養之名曾無矜贍
之實明加檢校使得存養若有名行顯著操履修潔及
學業才能一藝可取咸宜訪採將身入朝所在州縣以
禮發遣其蠹政害人不便於時者使還之日具錄奏聞
己酉以吳州總管宇文弼爲刑部尙書二月己卯以尙
書左僕射楊素爲尙書令三月丁未詔尙書令楊素納
言楊達將作大匠宇文愷營建東京徙豫州郭下居民

以實之戊申詔曰聽採輿頌謀及黎庶故能審政刑之得失是知昧且思治欲使幽枉必達彝倫有章而牧宰任稱朝委苟爲僥倖以求考課虛立殿最不存理實綱紀於是不理冤屈所以莫申關河重阻無由自達朕故建立東京躬親存問今將巡歷淮海觀省風俗眷求讜言徒繁詞翰而鄉校之內闕爾無聞恇然夕惕用勞輿寢其民下有知州縣官人政理苛刻侵害百姓背公徇私不便於民者聽詣朝堂封奏庶乎四聰以達天下無冤又於阜澗營顯仁宮採海內奇禽異獸草木之類以實園苑徙天下富商大賈數萬家於東京辛亥發河南

諸郡男女七百萬開通濟渠自西苑引穀洛水達于河
自板渚引河通于淮庚申遣黃門侍郎王弘上儀同於
士澄往江南採木造龍舟鳳舫黃龍赤艦樓船等數萬
艘夏四月癸亥大將軍劉仲方擊林邑破之五月庚戌
戶部尙書義豐侯韋沖卒甲子熒惑入太微秋七月丁
酉制戰亡之家給復十年景午滕王綸衛王集竝奪爵
徙邊閏七月甲子以尙書令楊素爲太子太師安德王
雄爲太子太傅河間王弘爲太子太保景子詔曰君民
建國教學爲先移風易俗必自茲始而言絕義乖多歷
年代進德修業其道浸微漢採坑焚之餘不絕如線晉

承板蕩之運掃地將盡自時厥後軍國多虞雖復黷宇
時建示同愛禮函丈或陳殆爲虛器遂使紆青拖紫非
以學優製錦操刀類多牆面上陵下替網維不立雅缺
道消實由於此朕纂承洪緒思演大訓將欲尊師重道
用闡厥繇講信修睦敦獎名教方今區宇平壹文軌攸
同十步之內必有芳草四海之中豈乏孝秀諸在家及
見入學者若有篤志好古耽典悅禮學行優敏堪膺時
務所在採訪具以名聞卽當隨其器能擢以不次若研
精經術未願進仕可依其藝業深淺門蔭高卑雖未升
朝並量準給祿庶夫恂恂誘善不日成器濟濟盈朝何

遠之有其國子等學亦宜申明舊制教習生徒具爲課
試之法以盡砥礪之道八月壬寅上御龍舟幸江都以
左武衛大將軍郭衍爲前軍右武衛大將軍李景爲後
軍文武官五品已上給樓船九品以上給黃篋舳艫相
接二百餘里冬十月己丑赦江淮已南揚州給復五年
舊總管內給復三年十一月己未以大將軍崔仲方爲
禮部尙書

二年春正月辛酉東京成賜監督者有差以大理卿梁
毗爲刑部尙書丁卯遣十使併省州縣二月景戌詔尙
書令楊素吏部尙書牛弘大將軍宇文愷內史侍郎虞

世基禮部侍郎許善心制定輿服始備輦輅及五時副
車上常服皮弁十有二琪文官弁服珮玉五品已上給
犢車通幟三公親王加油絡武官平巾幘袴褶三品已
上給炮槊下至胥吏服色各有差非庶人不得戎服戊
戌置都尉官三月庚午車駕發江都先是太府少卿何
稠太府丞雲定與盛修儀仗於是課州縣送羽毛百姓
求捕之網羅被水陸禽獸有堪斃毘之用者殆無遺類
至是而成夏四月庚戌上自伊闕陳法駕備千乘萬騎
入於東京辛亥上御端門大赦天下免今年租賦癸丑
以冀州刺史楊文思爲民部尙書五月甲寅金紫光祿

大夫兵部尚書李通坐事免乙卯詔曰旌表先哲式在
饗祀所以優禮賢能顯彰遺愛朕永鑒前修尙想名德
何嘗不興歎九原屬懷千載其自古以來賢人君子有
能樹聲立德佐世匡時博利殊功有益於人者並宜營
立祠宇以時致祭墳壟之處不得侵踐有司量爲條式
稱朕意焉六月壬子以尚書令太子太師楊素爲司徒
進封豫章王暕爲齊王秋七月癸丑以衛尉卿衛玄爲
工部尚書庚申制百官不得計考增級必有德行功能
灼然顯著者擢之壬戌擢藩邸舊臣鮮于羅等二十七
人官爵有差甲戌皇太子昭薨乙亥上柱國司徒楚國

公楊素薨八月辛卯封皇孫倓爲燕王侗爲越王侑爲
代王九月乙丑立秦王俊子浩爲秦王冬十月戊子以
靈州刺史段文振爲兵部尙書十二月庚寅詔曰前代
帝王因時創業君民建國禮尊南面而歷運推移年代
永久丘壟殘毀樵牧相趨塋兆堙蕪封樹莫辨興言淪
滅有愴于懷自古以來帝王陵墓可給隨近十戶蠲其
雜役以供守視

三年春正月癸亥勅并州逆人已流配而逃亡者所獲
之處卽宜斬決景子長星竟天出於東壁二旬而止是
月武陽郡上言河水清二月己丑彗星見於東井文昌

歷大陵五車北河入太微掃帝座前後百餘日而止三

月辛亥車駕還京師壬子以大將軍姚辨爲左衛將軍

癸丑遣羽騎朱寬使於流求國乙卯河間王弘薨夏四

月庚辰詔曰古者帝王觀風俗皆所以憂勤兆庶安集

遐荒自蕃夷內附未遑親撫山東經亂復加存恤今欲

安輯河北巡省趙魏所司依式甲申頒律令大赦天下

關內給復三年壬辰改州爲郡改度量衡並依古式改

上柱國以下官爲大夫甲午詔曰天下之重非獨理所

安帝王之功豈一士之畧自古明君哲后立政經邦何

嘗不選賢與能振拔淹滯周稱多士漢號得人尙想前

風載懷欽佇朕負晨夙興冕旒待旦引領巖谷寘以周
行冀與羣才共康庶績而彙茅寂漠投竿罕至豈美璞
韜采未值良工將介石在懷確乎難拔永鑒前哲憮然
興歎凡厥在位譬諸股肱若濟巨川義同舟楫豈得保
茲寵祿晦爾所知優游卒歲甚非謂也祁大夫之舉善
良史以爲至公臧文仲之蔽賢尼父譏其竊位求諸往
古非無褒貶宜思進善用匡寡薄夫孝悌有聞人倫之
本德行敦厚立身之基或節義可稱或操履清潔所以
激貪厲俗有益風化強毅正直執憲不撓學業優敏文
才美秀並爲廊廟之用實乃瑚璉之資才堪將略則拔

之以禦侮力有驍壯則任之以爪牙爰及一藝可取亦宜採錄若衆善畢舉與時無棄以此求理庶幾非遠文武有職事者五品已上宜依令十科舉人有一於此不必求備朕當待以不次隨才升用其見任九品已上官者不在舉送之限景申車駕北巡狩丁酉以刑部尙書宇文弼爲禮部尙書戊戌勅百司不得殘暴禾稼其有須開爲路者有司計地所收卽以近倉酬賜務從優厚已亥至赤岸澤以太牢祭故太師李穆五月丁巳突厥啓民可汗遣子拓特勒來朝戊午發河北十餘郡丁男自太行山達于并州以通馳道景寅啓民可汗遣其兄

子毗黎伽特勒來朝辛酉啓民可汗使請自入塞奉迎
輿駕上不許癸酉有星孛于文昌上將星常皆動搖六
月辛巳獵於連谷丁亥詔曰聿追孝饗德莫至焉崇建
寢廟禮之大者然則質文異代損益殊時學滅坑焚經
典散逸憲章湮墜廟堂制度師說不同所以世數多少
莫能是正連室異宮亦無定准朕獲奉祖宗欽承景業
永惟嚴配冀隆大典於是詢謀在位博訪儒術咸以爲
高祖文皇帝受天明命奄有區夏拯羣飛於四海革彫
弊於百五恤獄緩刑生靈皆遂其性輕徭薄賦比屋各
安其業芟夷宇宙混一車書東漸西被無思不服南征

北怨俱荷來蘇駕毳乘風歷代所弗至辨髮左衽聲教
所罕及莫不厥角關塞頓顙闕庭譯靡絕時書無虛月
韜戈偃伯天下晏如嘉瑞休徵表裏禔福猗歟偉歟無
得而名者也朕又聞之德厚者流光理辨者禮縟是以
周之文武漢之高光其典章特立諡號斯重豈非緣情
稱述卽崇顯之義乎高祖文皇帝宜別建廟宇以彰巍
巍之德仍遵月祭用表蒸蒸之懷有司以時創造務合
典制又各位旣殊禮亦異等天子七廟事著前經諸侯
二昭義有差降故知以多爲貴王者之禮今可依用貽
厥後昆戊子次榆林郡丁酉啓民可汗來朝己亥吐谷

渾高昌並遣使貢方物甲辰上御北樓觀漁于河以宴
百寮秋七月辛亥啓民可汗上表請變服襲冠帶詔啓
民贊拜不名在諸侯王上甲寅上於郡城東御大帳其
下備儀衛建旌旗宴啓民及其部落三千五百人奏百
戲之樂賜啓民及其部落各有差景子殺光祿大夫賀
若弼禮部尙書宇文弼太常卿高頴尙書左僕射蘇威
坐事免發丁男百餘萬築長城西距榆林東至紫河二
旬而罷死者十五六八月壬午車駕發榆林乙酉啓民
飾廬清道以候乘輿帝幸其帳啓民奉觴上壽宴賜極
厚上謂高麗使者曰歸語爾王當早來朝見不然者吾

與啓民巡彼土矣皇后亦幸義城公主帳己丑啓民可
汗歸蕃癸巳入樓煩關壬寅次太原詔營晉陽宮九月
己未次濟源幸御史大夫張衡宅宴飲極歡己巳至于
東都壬申以齊王暕爲河南尹開府儀同三司癸酉以
戶部尙書楊文思爲納言

四年春正月乙巳詔發河北諸郡男女百餘萬開永濟
渠引沁水南達于河北通涿郡庚戌百寮大射於允武
殿丁卯賜城內居民米各十石壬申以太府卿元壽爲
內史令鴻臚卿楊玄感爲禮部尙書癸酉以工部尙書
衛玄爲右武侯大將軍大理卿長孫熾爲戶部尙書二

月巳卯遣司朝謁者崔毅使突厥處羅致汗血馬三月辛酉以將作大匠宇文愷爲工部尙書壬戌百濟倭赤土迦羅含國並遣使貢方物乙丑車駕幸五原因出塞巡長城景寅遣屯田主事常駿使赤土致羅罽夏四月景午以離石之汾源臨泉鴈門之秀容爲樓煩郡起汾陽宮癸丑以河內太守張定和爲左屯衛大將軍乙卯詔曰突厥意利珍豆啓民可汗率領部落保附關塞遵奉朝禮思改戎俗頻入謁覲屢有陳請以氈牆毳幕事窮荒陋上棟下宇願同比屋誠心懇切朕之所重宜於萬壽戍置城造屋其帷帳牀褥以上隨事量給務從優

厚稱朕意焉五月壬申蜀郡獲三足烏張掖獲玄狐各
一秋七月辛巳發丁男二十餘萬築長城自榆林谷而
東乙未左翊衛大將軍宇文述破吐谷渾於曼頭赤水
八月辛酉親祠恒岳河北道郡守畢集大赦天下車駕
所經郡縣免一年租調九月辛未徵天下鷹師悉集東
京至者萬餘人戊寅彗星出五車掃文昌至房而滅辛
巳詔免長城役者一年租賦冬十月景午詔曰先師尼
父聖德在躬誕發天縱之姿憲章文武之道命世膺期
蘊茲素王而頽山之歎忽踰於千祀盛德之美不在於
百代永惟懿範宜有優崇可立孔子後爲紹聖侯有司

求其苗裔錄以申上辛亥詔曰昔周王下車首封唐虞之胤漢帝承歷亦命殷周之後皆所以褒立先代憲章在昔朕嗣膺景業傍求雅訓有一弘益欽若令典以爲周兼夏殷文質大備漢有天下車書混一魏晉沿襲風流未遠並宜立後以存繼絕之義有司可求其胄緒列聞乙卯頒新式於天下

五年春正月景子改東京爲東都癸未詔天下均田戊子自上東都還京師己丑制民間鐵叉搭鈎積刃之類皆禁絕之太守每歲密上屬官景迹二月戊戌次于闕鄉詔祭古帝王陵及開皇功臣墓庚子制漢魏周官不

得爲蔭辛丑赤土國遣使貢方物戊申車駕至京師景
辰宴耆舊四百人於武德殿頒賜各有差己未上御崇
德殿之西院愀然不悅顧謂左右曰此先帝所居實用
增感情所未安於此院之西別營一殿壬戌制父母聽
隨子之官三月己巳車駕西巡河右庚午有司言武功
男子史永遵與從父昆弟同居上嘉之賜物一百段米
二百石表其門閭乙亥幸扶風舊宅夏四月己亥大獵
於隴西壬寅高麗吐谷渾伊吾並遣使來朝乙巳次狄
道党項羌來貢方物癸亥出臨津關度黃河至西平陳
兵講武五月乙亥上大獵於延山長圍周亘二千里庚

辰入長寧谷壬午度星嶺甲申宴羣臣於金山之上景
戌梁浩豐御馬度而橋壞斬朝散大夫黃亘及督役者
九人吐谷渾主率衆保覆袁川帝分命內史元壽南屯
金山兵部尙書段文振北屯雪山太僕卿楊義臣東屯
琵琶峽將軍張壽西屯泥嶺四面圍之吐谷渾主伏允
以數十騎遁出遣其名王詐稱伏允保車我真山壬辰
詔右屯衛大將軍張定和往捕之定和挺身挑戰爲賊
所殺亞將柳武建擊破之斬首數百級甲午其仙頭王
窮蹙率男女十餘萬口來降六月丁酉遣左光祿大夫
梁默右翊衛將軍李瓊等追吐谷渾主皆遇賊死之癸

卯經大斗拔谷山路隘險魚貫而出風霰晦暝與後宮相失士卒凍死者大半景午次張掖辛亥詔諸郡學業該通才藝優洽膂力驍壯超絕等倫在官勤奮堪理政事立性正直不避強禦四科舉人壬子高昌王麴伯雅來朝伊吾吐屯設等獻西域數千里之地上大悅癸丑置西海河源郡善且末等四郡景辰上御觀風行殿盛陳文物奏九部樂設魚龍曼延宴高昌王吐屯設於殿上以寵異之其蠻夷陪列者三十餘國戊午大赦天下開皇已來流配悉放還鄉晉陽逆黨不在此例隴右諸郡給復三年秋七月丁卯置馬牧於青海渚中以求龍

種無効而止九月癸未車駕入長安冬十月癸亥詔曰
優德尙齒載之典訓尊事乞言義彰膠序鸞熊爲師無
取筋力方叔元老克壯其猷朕永言稽古用求至理是
以厪眉黃髮更令收敘務簡秩優無虧藥餌庶等臥理
佇其弘益今歲耆老赴集者可於近郡處置年七十已
上疾患沉滯不堪居職卽給賜帛送還本郡其官至七
品以上者量給廩以終厥身十一月景子車駕幸東都
六年春正月癸亥朔旦有盜數十人皆素冠練衣焚香
持華自稱彌勒佛入自建國門監門者皆稽首旣而奪
衛士仗將爲亂齊王暕遇而斬之於是都下大索與相

連坐者千餘家丁丑角觝大戲於端門街天下奇伎異
藝畢集終月而罷帝數微服往觀之己丑倭國遣使貢
方物二月乙巳武賁郎將陳稜朝請大夫張鎮州擊流
求破之獻俘萬七千口頒賜百官乙卯詔曰夫帝圖草
創王業艱難咸依股肱叶同心德用能救厥頽運克膺
大寶然後疇庸茂賞開國承家誓以山河傳之不朽近
代凋喪四海未壹茅土妄假名實相乖歷茲永久莫能
懲革皇運之初百度伊始猶循舊貫未暇改作今天下
交泰文軌攸同宜率遵先典永垂大訓自今已後唯有
功勲乃得賜封仍令子孫承襲景辰改封安德王雄爲

觀王河間王子慶爲郇王庚申徵魏齊周陳樂人悉配
太常三月癸亥幸江都宮甲子以鴻臚卿史祥爲左驍
衛大將軍夏四月丁未宴江淮已南父老頒賜各有差
六月辛卯室韋赤土並遣使貢方物壬辰鴈門賊帥尉
文通聚衆三千保於莫壁谷遣鷹揚楊伯泉擊破之甲
寅制江都太守秩同京尹冬十月壬申刑部尙書梁毗
卒壬子戶部尙書銀青光祿大夫長孫熾卒十二月己
未左光祿大夫吏部尙書牛弘卒辛酉朱崖人王萬昌
舉兵作亂遣隴西太守韓洪討平之

七年春正月壬寅左武衛大將軍光祿大夫真定侯郭

衍卒二月己未上升釣臺臨楊子津大宴百寮頒賜各有差庚申百濟遣使朝貢乙亥上自江都御龍舟入通濟渠遂幸于涿郡壬午詔曰武有七德先之以安民政有六本興之以教義高麗虧失藩禮將欲問罪遼左恢宣勝略雖懷伐國仍事省方今往涿郡巡撫民俗其河北諸郡及山西山東年九十已上版授太守八十者授縣令三月丁亥右光祿大夫左屯衛大將軍姚辯卒夏四月庚午幸涿郡之臨朔宮五月戊子以武威太守樊子蓋爲民部尙書秋大水山東河南漂沒三十餘郡民相賣爲奴婢冬十月乙卯底柱山崩偃木逆流數十里

戊午以東平太守吐萬緒爲左屯衛大將軍十二月己酉突厥處羅多利可汗來朝帝大悅接以殊禮于時遼東戰士及餽運者填咽於道晝夜不絕苦役者始爲羣盜甲子勅都尉鷹揚與郡縣相知追捕隨獲斬決之

八年春正月辛巳大軍集于涿郡以兵部尙書段文振爲左候衛大將軍壬午下詔曰天地大德降繁霜於秋令聖哲至仁著兵甲於刑典故知造化之有肅殺義在無私帝王之用干戈蓋非獲已版泉丹浦莫匪龔行取亂覆昏咸由順動況乎甘野誓師夏啓承大禹之業商郊問罪周發成文王之志永監載籍屬當朕躬粵我有

隋誕膺靈命兼三才而建極一六合而爲家提封所漸
細柳蟠桃之外聲教爰暨紫杏黃枝之域遠至邇安罔
弗和會功成理定於是乎在而高麗小醜迷昏不恭崇
聚勃碣之間荐食遼碣之境雖復漢魏誅夷巢窟豐擾
亂離多阻種落還集萃川藪於前代播實繁以迄今睠
茲華壤翦爲夷類歷年永久惡稔旣盈天道禍淫亡徵
已兆亂常敗德非可勝圖掩慝懷姦唯日不足移告之
嚴未嘗面受朝覲之禮莫肯躬親誘納亡叛不知紀極
充斥邊垂亟勞烽候關櫺以之不靜生人爲之廢業在
昔薄伐已漏天網旣緩前禽之戮未卽後服之誅曾不

懷恩翻其長惡乃兼契丹之黨虔劉海戍習鞞鞮之服
侵軼遼西又青丘之表咸修職貢碧海之濱同稟正朔
遂復寇攘琛賫遏絕往來虐及弗辜誠而遇禍輶軒奉
使爰暨海東旌節所次途經藩境而擁塞道路拒絕王
人無事君之心豈爲臣之禮此而可忍孰不可容且法
令苛酷賦歛煩重疆臣豪族咸執國均朋黨比周以之
成俗賄貨如市冤枉莫申重以仍歲災凶北屋饑饉兵
戈不息徭役無期力竭轉輸身填溝壑百姓愁苦爰誰
適從境內哀惶不勝其弊回面內向各懷性命之圖黃
髮稚齒咸興酷毒之歎省俗觀風爰屆幽朔弔人問罪

無俟再駕親總六師用申九伐拯厥阽危協從天意殄
茲逋穢克嗣先謨今宜授律啓行分麾屆路掩勃澥而
雷震及扶餘以電掃比戈按甲俟誓而後行三令五申
必勝而後戰左第一軍可鏤方道第二軍可長岑道第
三軍可海冥道第四軍可蓋馬道第五軍可建安道第
六軍可南蘇道第七軍可遼東道第八軍可玄菟道第
九軍可扶餘道第十軍可朝鮮道第十一軍可沃沮道
第十二軍可樂浪道右第一軍可粘蟬道第二軍可含
資道第三軍可渾彌道第四軍可臨屯道第五軍可候
城道第六軍可提奚道第七軍可踏頓道第八軍可肅

慎道第九軍可碣石道第十軍可東腕道第十一軍可帶方道第十二軍可襄平道凡此衆軍先奉廟略駱驛引途總集平壤莫非如豺如貔之勇百戰百勝之雄顧眄則山岳傾頽叱咤則風雲騰鬱腹心攸同爪牙斯在朕躬馭元戎爲其節度涉遼而東循海之右解倒懸於遐裔問疾苦於遺黎其外輕齋游闕隨機赴響卷甲銜枚出其不意又滄海道軍舟艦千里高颿電逝巨艦雲飛橫斷沮江逕造平壤島嶼之望斯絕坎井之路已窮其餘被髮左衽之人控弦待發微盧彭濮之旅不謀同辭仗順臨逆人百其勇以此衆戰勢等摧枯然則王者

之師義存止殺聖人之教必也勝殘天罰有罪本在元惡人之多辟脅從罔理若高元泥首轅門自歸司寇卽解縛焚襯弘之以恩其餘臣人願歸朝奉化咸加慰撫各安生業隨才任用無隔夷夏營壘所次務在整肅芻蕘有禁秋毫勿犯以布恩宥以喻禍福若其同惡相濟抗拒官軍國有常刑俾無遺類明加曉示稱朕意焉總一百一十三萬三千六百號二百萬其餽運者倍之癸未第一軍發終四十日引師乃盡旌旗亘千里近古出師之盛未之有也乙未以右候衛大將軍衛玄爲刑部尚書甲辰內史令元壽卒二月甲寅詔曰朕觀風燕裔

問罪遼瀆文武叶力爪牙思奮莫不執銳勤王捨家從
役罕蓄倉廩之資兼捐播殖之務朕所以夕惕愀然慮
其匱乏雖復素飽之衆情在忘私悅使之徒宜從其厚
諸行從一品以下飲飛募人以上家口郡縣宜數存問
若有糧食乏少皆賑給之或雖有田疇貧弱不能自耕
種可於多丁富室勸課相助使夫居者有歛積之豐行
役無顧後之慮壬戌司空京兆尹光祿大夫觀王雄薨
三月辛卯兵部尙書左候衛大將軍段文振卒癸巳上
御師甲午臨戎于遼水橋戊戌大軍爲賊所拒不果濟
右屯衛大將軍左光祿大夫麥鐵杖武賁郎將錢士雄

孟金叉等皆死之甲午車駕度遼大戰于東岸擊賊破
之進圍遼東乙未大頓見二大鳥高丈餘皜身朱足游
泳自若上異之命工圖寫并立銘頌五月戊午納言楊
達卒于時諸將各奉旨不敢越機既而高麗各固城守
攻之不下六月己未幸遼東責怒諸將止城西數里御
六合城七月壬午宇文述等敗績于薩水右屯衛將軍
薛世雄死之九軍並陷師奔還亡者千餘騎癸卯班師
九月庚辰上至東都已丑詔軍國異容文武殊用匡危
拯難則霸德攸興化人成俗則王道斯貴時當撥亂屠
販可以登朝世屬隆平經術然後升仕豐都爰肇儒服

無預於周行建武之朝功臣不參於吏職自三方未一四海交爭不遑文教唯尙武功設官分職罕以才授班朝理人乃由勲敘莫非拔足行陣出自勇夫學教之道旣所不習政事之方故亦無取是非暗於在己威福專於下吏貪冒貨賄不知紀極蠹政害民實由於此自今已後諸授勲官者並不得回授文武職事庶遵彼更張取類於調瑟求諸名製不傷於美錦若吏部輒擬用者御史卽宜糾彈冬十月戊寅工部尙書宇文愷卒十一月己卯以宗女華容公主嫁于高昌王辛巳光祿大夫韓壽卒甲申敗將宇文述于仲文等除名爲民斬尙書

右丞劉士龍以謝天下是歲大旱疫人多死山東尤甚
密詔江淮南諸郡閱視民間童女姿質端麗者每歲貢
之

九年春正月丁丑徵天下兵募民爲驍果集于涿郡壬
午賊帥杜彥永王潤等陷平原郡大掠而去辛卯置折
衝果毅武勇雄武等郡將官以領驍果乙未平原李德
逸聚衆數萬稱阿舅賊劫掠山東靈武白榆妄稱奴賊
劫掠牧馬北連突厥隴右多被其患遣將軍范貴討之
連年不能克戊戌大赦己亥遣代王侑刑部尙書衛立
鎮京師辛丑以右驍衛將軍李渾爲右驍衛大將軍二

月己未濟北人韓進洛聚衆數萬爲羣盜壬午復宇文述等官爵又徵兵討高麗三月景子濟北人孟海公起兵爲盜衆至數萬丁丑發丁男十萬城太興戊寅幸遼東以越王侗工部尙書樊子蓋鎮東都庚子北海人郭方預聚徒爲賊自號盧公衆至三萬攻陷郡城大掠而去夏四月庚午車駕度遼壬申遣宇文述楊義臣趣平壤城五月丁丑熒惑入南斗己卯濟北人甄寶車聚衆萬餘寇掠城邑六月乙巳禮部尙書楊玄感反於黎陽景辰玄感逼東都河南賡理裴弘策拒之反爲賊所敗戊辰兵部侍郎斛斯政奔于高麗庚午上班師高麗犯

後軍勅右武衛大將軍李景爲後拒遣左翊衛大將軍
宇文述左候衛將軍屈突通等馳傳發兵以討玄感秋
七月己卯令所在發人城縣府驛癸未餘杭人劉元進
舉兵反衆至數萬八月壬寅左翊衛大將軍宇文述等
破楊玄感於閔鄉斬之餘黨悉平癸卯吳人朱燮晉陵
人管崇擁衆十萬餘自稱將軍寇江左甲辰制驍果之
家蠲免賦役丁未詔郡縣城去道過五里已上者徙就
之戊申制盜賊籍沒其家乙卯賊帥陳瑱等三萬攻陷
信安郡辛酉司農卿光祿大夫葛國公趙元淑以罪伏
誅九月己卯濟陰人吳海流東海人彭孝才並舉兵爲

盜衆數萬庚辰賊帥梁慧尙聚衆四萬陷蒼梧郡甲午
車駕次上谷以供費不給上大怒免太守虞荷等官丁
酉東陽人李三兒向但子舉兵作亂衆至萬餘閏月己
巳幸博陵庚午上謂侍臣曰朕昔從先朝周旋於此年
甫八歲日月不居倏經三紀追惟曩昔不可復希言未
卒流涕嗚咽侍衛者皆泣下沾襟冬十月丁丑賊帥呂
明星率衆數千圍東郡武賁郎將費青奴擊斬之乙酉
詔曰博陵昔爲定州地居衝要先王歷試所基王化斯
遠故以道冠幽風義高姚邑朕巡撫氓庶爰屆茲邦瞻
望郊壝緬懷敬止思所以宣播慶澤覃被下人崇紀顯

號式光令緒可改博陵爲高陽郡赦境內死罪以下給
復一年於是召高祖時故吏皆量才授職壬辰以納言
蘇威爲開府儀同三司朱燮管崇推劉元進爲天子遣
將軍吐萬緒魚俱羅討之連年不能尅齊人孟讓王薄
等衆十餘萬據長白山攻剽諸郡清河賊張金稱衆各
數萬勃海賊帥格謙自號燕王孫宣雅自號齊王衆各
十萬山東苦之丁亥以右候衛將軍郭榮爲右候衛大
將軍十一月己酉右候衛將軍馮孝慈討張金稱於清
河反爲所敗孝慈死之十二月甲辰車裂楊玄感弟朝
散大夫積善及黨與十餘人仍焚而揚之丁亥扶風人

向海明舉兵作亂稱皇帝建元白鳥遣太僕卿楊義臣擊破之

十年春正月甲寅以宗女爲信義公主嫁於突厥曷娑那可汗二月辛未詔百寮議伐高麗數日無故言者戊子詔曰竭力王役致身戎事咸由徇義莫非勤誠委命草芥暴骸原野興言念之每懷愍惻往年問罪將屆遼濱廟算勝略具有進止而諒愔凶罔識成敗高頰復恨本無智謀臨三軍猶兒戲視人命如草芥不遵成規坐貽撓退遂令死亡者衆不及埋藏今宜遣使人分道收葬設祭於遼西郡立道場一所恩加泉壤庶弭窮魂之

寃澤及枯骨用弘仁者之惠辛卯詔曰黃帝五十二戰
成湯二十七征方乃德施諸侯令行天下盧芳小盜漢
祖尙且親戎隗囂餘燼光武猶自登隴豈不欲除暴止
戈勞而後逸者哉朕纂承寶業君臨天下日月所照風
雨所霑孰非我臣獨隔聲教最爾高麗僻居荒裔鴟張
狼噬侮慢不恭抄竊我邊垂侵逼我城鎮是以去歲出
軍問罪遼碣燼長蛇於玄菟戮封豕於襄平扶餘衆軍
風馳電逝追奔逐北徑踰沮水滄海舟楫衝賊腹心焚
其城郭汙其宮室高元伏鎖泥首送款軍門尋請入朝
歸罪司寇朕以許其改過乃詔班師而長惡靡悛宴安

鳩毒此而可忍孰不可容便可分命六師百道俱進朕當親執武節臨御諸軍秣馬九都觀兵遼水順天誅於海外拯窮民於倒懸征伐以正之明德以誅之止除元惡餘無所問若有識存亡之分悟安危之機翻然北首自求多福必其同惡相濟抗拒王師若火燎原刑茲無赦有司便宜宣布咸使知聞丁酉扶風人唐弼舉兵反衆十萬推李弘爲天子自稱唐王三月壬子行幸涿郡癸亥次臨渝宮親御戎服禡祭黃帝斬叛軍者以鼙鼓夏四月辛未彭城賊張大彪聚衆數萬保縣薄山爲盜遣榆林太守董純擊破斬之甲午車駕次北平五月庚

子詔舉郡孝悌廉潔各十人壬寅賊帥宋世謨陷琅邪
庚申延安人劉迦論舉兵反自稱皇王建元大世六月
辛未賊帥鄭文雅林寶護等衆三萬陷建安郡太守楊
景祥死之秋七月癸丑車駕次懷遠鎮乙卯曹國遣使
貢方物甲子高麗遣使請降囚送斛斯政上大悅八月
己巳班師右衛大將軍左光祿大夫鄭榮卒冬十月丁
卯上至東都已丑還京師十一月景申支解斛斯政於
金光門外乙巳有事於南郊己酉賊帥司馬長安破長
平郡乙卯離石胡劉苗王舉兵反自稱天子以其第六
兒爲永安王衆至數萬將軍潘長文討之不能尅是月

賊帥王德仁擁衆數萬保林慮山爲盜十二月壬申上如東都其日大赦天下戊子入東都庚寅賊帥孟讓衆十餘萬據都梁宮遣江都丞王世克擊破之盡虜其衆十一年春正月甲午朔宴百寮突厥新羅靺鞨畢大辭訶咄傳越烏那曷波臘吐火羅俱慮建忽論靺鞨訶多沛汗龜茲疏勒于闐安國曹國何國穆國畢衣密失範延伽折契丹等國並遣使朝貢戊戌武賁郎將高建毗破賊帥顏宣政於齊郡虜男女數千口乙卯大會蠻夷設魚龍曼延之樂頒賜各有差二月戊辰賊帥楊仲緒等率衆萬餘攻北平滑公李景破斬之庚午詔曰設險

守國著自前經重門禦暴事彰往策所以宅土寧邦禁
邪固本而近代戰爭居人散逸田疇無伍郭郭不修遂
使遊惰實繁寇攘未息今天下平一海內晏如宜令人
悉城居田隨近給使強弱相容力役兼濟穿窬無所厝
其姦宄藿蒲不得聚其逋逃有司具爲事條務令得所
景子王須拔反自稱漫天王國號燕賊帥魏刁兒自稱
歷山飛衆各十餘萬比連突厥南寇趙三月丁酉殺右
驍衛大將軍光祿大夫郕公李渾將作監光祿大夫李
敏並族滅其家癸卯賊帥司馬長安破西河己酉幸太
原避暑汾陽宮秋七月己亥淮南人張起緒舉兵爲盜

衆至三萬辛丑光祿大夫右禦衛大將軍張壽卒八月
乙卯巡北塞戊辰突厥始畢可汗率騎數十萬謀襲乘
輿義成公主遣使告變壬申車駕馳幸鴈門癸酉突厥
圍城官軍頗戰不利上大懼欲率精騎潰圍而出民部
尙書樊子蓋固諫乃止齊王暕以後軍保于崞縣甲申
詔天下諸郡募兵於是守令各來赴難九月甲辰突厥
解圍而去丁未曲赦太原鴈門死罪已下冬十月壬戌
上至於東都丁卯彭城人魏騏驎聚衆萬餘爲盜寇魯
郡壬申賊帥盧明月聚衆十餘萬寇陳汝間東海賊李
子通擁衆度淮自號楚王建元明政寇江都十一月乙

卯賊帥王須拔破高陽郡十二月戊寅有大流星如斛墜明月營破其衝車庚辰詔民部尙書樊子蓋發關中兵討絳郡賊敬盤陔柴保昌等經年不能尅譙郡人朱粲擁衆數十萬寇荆襄僭稱楚帝建元昌達漢南諸郡多爲所陷焉

十二年春正月甲午鴈門人翟松栢起兵於靈丘衆至數萬轉攻傍縣二月己未真臘遣使貢方物甲子夜有二大鳥似鵬飛入大業殿止于御幄至明而去癸亥東海賊盧公暹率衆萬餘保于蒼山夏四月丁巳顯陽門災癸亥魏刁兒所部將甄翟兒號歷山飛衆十萬轉寇

太原將軍潘長文討之反爲所敗長文死之五月景戌朔日有蝕之旣癸巳大流星殞於吳郡爲石壬午上於景華宮徵求螢火得數斛夜出遊山而放之光遍巖谷秋七月壬戌民部尙書光祿大夫濟北公樊子蓋卒甲子幸江都宮以越王侗光祿大夫段達太府卿元文都檢校民部尙書韋津右武衛將軍皇甫無逸右司郎盧楚等總留守事奉信郎崔民象以盜賊克斥於建國門表諫不宜巡幸上大怒先解其頤乃斬之戊辰馮翊人孫華自號總管舉兵爲盜高涼通守洗瑤徹舉兵作亂嶺南溪洞多應之己巳熒惑守羽林月餘乃退車駕次

汜水奉信郎王愛仁以盜賊日盛諫上請還西京上怒
斬之而行八月乙巳賊帥趙萬海衆數十萬自恒山寇
高陽壬子有大流星如斗出王良閣道聲如壞牆癸丑
大流星如甕出羽林九月丁酉東海人杜伏威揚州沈
覓敵等作亂衆至數萬右禦衛將軍陳稜擊破之戊午
有二枉矢出北斗魁委曲虵形注於南斗壬戌安定人
荔非世雄殺臨涇令舉兵作亂自號將軍冬十月己丑
開府儀同三司左翊衛大將軍光祿大夫許公宇文述
薨十二月癸未鄱陽賊操天成舉兵反自號元興王建
元始興攻陷豫章郡乙酉以右翊衛大將軍來護爲開

府儀同三司行左翊衛大將軍壬辰鄱陽人林士弘自稱皇帝國號楚建元太平攻陷九江廬陵郡唐公破甄翟兒於西河虜男女千口

十三年春正月壬子齊郡賊杜伏威率衆度淮攻陷歷陽郡景辰勃海賊竇建德設壇於河間之樂壽自稱長樂王建元丁丑辛巳賊帥徐圓朗率衆數千破東平郡弘化人到合城聚衆萬餘人爲盜傍郡苦之二月壬午朔方人梁師都殺郡丞唐世宗據郡反自稱大丞相遣銀青光祿大夫張世隆擊之反爲所敗戊子賊率王子英破上谷郡己丑馬邑校尉劉武周殺太守王仁恭舉

兵作亂北連突厥自稱定楊可汗庚寅賊帥李密翟讓等陷興洛倉越王侗遣武賁郎將劉長恭光祿少卿房崱擊之反爲所敗死者十五六庚子李密自號魏公稱元年開倉以賑郡盜衆至數十萬河南諸郡相繼皆陷焉壬寅劉武周破武賁郎將王智辯於桑乾鎮智辯死之三月戊午廬江人張子路舉兵反遣右禦衛將軍陳稜討平之丁丑賊帥李通德衆十萬寇廬江左屯衛將軍張鎮州擊破之夏四月癸未金城校尉薛舉率衆反自稱西秦霸王建元秦興攻陷隴右諸郡己丑賊帥孟讓夜入東都外郭燒豐都市而去癸巳李密陷迴洛東

倉丁酉賊帥房憲伯陷汝陰郡是月光祿大夫武賁郎
將裴仁基淮陽太守趙佗等並以衆叛歸李密五月辛
酉夜有流星如瓊墜於江都甲子唐公起義師於太原
景寅突厥數千寇太原唐公擊破之秋七月壬子熒惑
守積屍景辰武威人李軌舉兵反攻陷河曲諸郡自稱
涼王建元安樂八月辛巳唐公破武牙郎將宋老生於
霍邑斬之九月己丑帝括江都人女寡婦以配從兵是
月武陽郡丞元寶藏以郡叛歸李密與賊帥李文相攻
陷黎陽倉彗星見於營室冬十月丁亥太原楊世洛聚
衆萬餘人寇掠城邑景申羅令蕭銑以縣反鄱陽人董

景珍以郡反迎銑於羅縣號爲梁王攻陷傍郡戊戌武
賁郎將高毗敗濟北郡賊甄寶車於嶮山十一月景辰
唐公入京師辛酉遙尊帝爲太上皇立代王侑爲帝改
元義寧上起宮丹楊將遜于江左有烏鵲來巢幄帳驅
不能止熒惑犯太微有石自江浮入于楊子日光四散
如流血上甚惡之二年三月右屯衛將軍宇文化及武
賁郎將司馬德戡元禮監門直閣裴虔通將作少監宇
文智及武勇郎將趙行樞鷹揚郎將孟景內史舍人元
敏符璽郎李覆牛方裕千牛左右李孝本弟孝質直長
許弘仁薛世良城門郎唐奉義醫正張愷等以驍果作

亂入犯宮闈上崩于温室時年五十蕭后令宮人撤牀
簀爲棺以埋之化及發後右禦衛將軍陳稜奉梓宮於
成象殿葬吳公臺下發斂之始容貌若生衆咸異之大
唐平江南之後改葬雷塘初上自以蕃王次不當立每
矯情飾行以釣虛名陰有奪宗之計時高祖雅重文獻
皇后而性忌妾媵皇太子勇內多嬖幸以此失愛帝後
庭有子皆不育之示無私寵取媚於后大臣用事者傾
心與交中使至第無貴賤皆曲承顏色申以厚禮婢僕
往來者無不稱其仁孝又常私入宮掖密謀於文獻后
楊素等因機構扇遂成廢立自高祖大漸暨諒闇之中

蒸淫無度山陵始就卽事巡游以天下承平日久士馬
全盛慨然慕秦皇漢武之事乃盛理宮室窮極侈靡召
募行人分使絕域諸蕃至者厚加禮賜有不恭命以兵
擊之盛興屯田於玉門柳城之外課天下富室分道市
武馬疋直十餘萬富強坐是而凍餒者十家而九性多
詭譎所幸之處不欲人知每幸之所輒數道置頓四海
珍羞殊味水陸必備焉求市者無遠不至郡縣官人競
爲獻食豐厚者進擢踈儉者獲罪姦吏侵漁內外虛竭
頭會箕歛人不聊生于時軍國多務日不暇給帝方驕
怠惡聞政事冤屈不理奏請罕決又猜忌臣下無所專

任朝臣有不合意者必構其罪而族滅之高潁賀若弼
先皇心膂參謀帷幄張衡李金才藩邸惟舊績著經綸
惡其直道忌其正議求其無形之罪加以丹頸之戮其
餘事君盡禮饗饗匪躬無辜無罪橫受夷戮者不可勝
紀政刑弛紊賄貨公行莫敢有言道路以目六軍不息
百役繁興行者不歸居者失業人飢相食邑落爲墟上
弗之恤也東西行幸靡有定居每以供費不給逆收數
年之賦所至唯與後宮流連耽湎惟日不足招迎姥媪
朝夕共肆醜言又引少年令與宮人穢亂不軌不遜以
爲娛樂區宇之內盜賊蜂起劫掠從官屠陷城邑近臣

互相掩蔽皆隱賊數不以實對或有言賊多者輒大被詰責各求苟免上下相蒙每出師徒敗亡相繼戰士盡力不加賞賜百姓無辜咸受屠戮蒸庶積怨天下土崩至於就禽而猶未之寤也

恭皇帝諱侑元德太子之子也母曰韋妃性聰敏有氣度大業三年立爲陳王後數載徙爲代王及煬帝親征遼東令於京師總留事十一年從幸晉陽拜太原太守尋鎮京師義兵入長安尊煬帝爲太上皇奉帝纂業義寧元年十一月壬戌上卽皇帝位於大興殿詔曰王道喪亂天步不康屬之於朕逢此百罹襁褓之歲夙遭憫

凶孺子之辰太上播越興言感動實疚于懷太尉唐公
膺期作宰糾合義兵翼戴皇室爰奉明詔弼予幼冲顯
命光臨天威咫尺對揚尊號悼心失圖一人在遠三讓
不遂僂俛南面厝身無所苟利社稷莫敢或違俯從羣
議奉遵聖旨可大赦天下改大業十三年爲義寧元年
十一月十六日昧爽以前大辟罪已下皆赦除之常赦
所不免者不在赦限甲子以光祿大夫大將軍太尉唐
公爲假黃鉞使持節大都督內外諸軍事尚書令大丞
相進封唐王景寅詔曰朕惟孺子未出深宮太上遠巡
追蹤穆滿時逢多難委當尊極辭不獲免恭已臨朝若

涉大川罔知所濟民之情僞曾未之聞賴股肱勳力上
宰賢良匡佐冲人輔其不逮軍國機務事無大小文武
設官位無貴賤憲章賞罰咸歸相府庶績其凝責成斯
屬己巳以唐王子隴西公建成爲唐國世子敦煌公爲
京兆尹改封秦公元吉爲齊公太原置鎮北府乙亥張
掖康老和舉兵反十二月癸未薛舉自稱天子寇扶風
秦公爲元帥擊破之丁亥桂陽人曹武徹舉兵反建元
通聖丁酉義師禽驍衛大將軍屈突通於閩鄉乙巳賊
帥張善安陷廬江郡

二年春正月丁未詔唐王劒履上殿入朝不趨贊拜不

名加前後羽葆鼓吹壬戌將軍王世克爲李密所敗河
內通守孟善誼武賁郎將王辨楊威劉長恭梁德董智
通皆死之庚戌河陽郡尉獨孤武都降於李密三月景

辰右屯衛將軍宇文化及弒太上皇於江都宮右禦衛
將軍獨孤盛死之齊王暕趙王杲燕王倓右翊衛大將
軍宇文協內史侍郎虞世基御史大夫裴蘊給事郎許
善心皆遇害化及立秦王浩爲帝自稱大丞相朝士文
武皆受其官爵光祿大夫宿公麥木折衝郎將朝請大
夫沈同謀討賊夜襲化及營反爲所害戊辰詔唐王備
九錫之禮加璽紱遠游冠綠綬綬位在諸侯王上唐國

置丞相已下一依舊式五月乙巳朔詔唐王冕十有二旒建天子旌旗出警入蹕金根車駕備五時副車置旒頭雲罕車儻八佾設鍾虞宮縣王后王子王女爵命之號一遵舊典戊午詔曰天禍隋國大行太上皇遇盜江都憫予小子哀號永感仰惟荼毒仇復靡申相國唐王膺期命世扶危拯溺自北徂南東征西怨總九合於一匡決百勝於千里糾率夷夏大庇氓黎保乂朕躬繫王是賴德侔造化功格蒼旻兆庶歸心歷數斯在屈爲人臣載違天命當今九服崩離三靈改卜大運去矣請避賢路私僮命駕須歸藩國予本代王及予而代天之所

廢豈期如是庶憑稽古之聖以誅四凶幸值惟新之恩
預克三恪雪冤恥於皇祖守禋祀爲孝孫朝聞夕殞及
泉無恨今遵故事遜於舊邸庶官羣辟改事唐朝宜依
前典趣上尊號若釋重負感泰兼懷假手真人俾除醜
逆仍勅有司凡有表奏皆不得以聞是日上遜位於大
唐以爲鄴國公武德二年夏五月崩時年十五

史臣曰煬帝爰在弱齡早有志尙南平吳會北却匈奴
昆弟之中獨著聲績於是矯情飾貌肆厥姦回故得獻
后鍾心文皇革慮天方肇亂遂升儲兩踐峻極之榮基
承丕顯之休命地廣三代威振八紘單于頓顙越常重

譯赤仄之泉流溢于都內紅腐之粟克積於塞下負其
富強之資思逞無狀之欲狹殷周之制度尙秦漢之規
摹恃才矜已傲徧明德內懷險躁外示凝簡盛冠服以
塞其姦除諫官以掩其過淫荒無度法令滋彰教絕四
維刑參五虐誅鋤骨肉屠剿忠良受賞者莫見其功爲
戮者莫聞其罪驕怒之兵屢動土木之功不息頻出朔
方三駕遼左旌旗萬里徵稅百端猾吏侵漁人弗堪命
乃急令暴賦以擾之嚴刑峻法以臨之甲兵威武以董
之自是海內騷然無聊生矣俄而玄感肇黎陽之亂匈
奴有鴈門之圍天子方棄中土遠之楊越姦宄乘釁強

弱相陵闕梁閉而不通皇輿往而莫返加以師旅因之以饑饉流離道路轉死溝壑十七八焉於是相聚藿蒲蝟毛而起大則跨州連郡稱帝稱王小則千百爲羣攻城剽邑流血成川澤死人如亂麻炊者不及析骸食者不遑易子茫茫九土並爲麋鹿之場慄慄黔黎俱克虵豕之餌四方萬里簡書相續猶謂鼠竊狗盜不足爲虞上下相蒙莫肯念亂振蜉蝣之羽窮長夜之樂土崩魚爛貫盈惡稔普天之下莫匪仇讎左右之人皆爲敵國終然不悟同彼望夷遂以萬乘之尊死於匹夫之手億兆靡感恩之士九牧無勤王之師子弟同就誅夷體

骨棄而莫掩社稷顛隕本枝殄絕自肇有書契以迄于茲宇宙崩離生靈塗炭喪身滅國未有若斯之甚也書曰天作孽猶可違自作孽不可追傳曰吉凶由人祗不妄作又曰兵猶火也不戢將自焚觀隋室之存亡斯言有徵矣恭帝年在幼沖遭家多難一人失德四海土崩羣盜蠡起豺狼塞路南巢遂往流彘不歸旣鍾百六之期躬踐數終之運謳歌有屬笙鍾變響雖欲不遵堯舜之迹庸可得乎

北史卷十二考證

煬皇帝紀上好學善屬文○

臣人龍

按凡本紀皆稱帝

此獨稱上與前後不畫一殆仍隋書史臣之舊未及改也

斬之石關下以謝三吳○石隋書作右

造龍舟鳳舩黃龍赤艦樓船等數萬艘○舩隋書作船

甲子熒惑入太微○甲子上隋書有六月二字

是月武陽郡上言河水清○上監本訛士今改正

二月己丑慧星見於東井文昌○東井隋書作奎掃

改度量衡並依古式○衡字上一本有權字

己亥至赤岸澤以太牢祭故太師李穆○一本穆下有墓字隋書同

壬戌百濟倭赤土迦羅含國並遣使貢方物○含隋書作舍

五月乙亥上大獵於延山○一本延上有拔字

冬十月乙卯底柱山崩偃木逆流數十里○木隋書作河此當係水字之訛

十二月己酉○酉一本作未

關楬以之不靜生人爲之廢業○生監本訛三今改從南本

三令五申○三監本訛先今改正

甲午臨戎於遼水橋○午監本誤子今從上癸巳下戊
戌改正

工部尚書樊子蓋○工隋書作民本卷七年五月戊子
亦云以武威太守樊子蓋爲民部尚書

臣宗萬

按杜

氏通典云後周置大司徒其屬有民部中大夫二人
掌計人民之衆寡隋改度支爲民部唐以廟諱改民
部爲戶部子蓋本傳云還除戶部尚書則工部誤也
又魏有農部郎曹隋之民部卽魏之農部

庚子北海人郭方預聚徒爲賊○預隋書作頂

徑踰沮水○一本沮作沮又下文秣馬九都句九作九
景子王須拔反○隋書景子下有上谷人三字

高涼通守洗瑤徹舉兵作亂○洗隋書作沈

五月辛酉夜有流星如甕墜于江都○酉監本訛耶今
從上文丁酉下文甲子改正

二年三月○二當係次字之訛今各本俱同仍之
恭皇帝紀光祿大夫宿公麥木○木一本作才

北史卷十三

唐

李

延

壽

撰

列傳第一

后妃上

魏神元皇后竇氏

文帝皇后封氏

桓皇后惟氏

平文皇后王氏

昭成皇后慕容氏

獻明皇后賀氏

道武皇后慕容氏

道武宣穆皇后劉氏

明元昭哀皇后姚氏

明元密皇后杜氏

太武皇后赫連氏

太武敬哀皇后賀氏

景穆恭皇后郁久闔氏

文成文明皇后馮氏 文成元皇后李氏

獻文思皇后李氏 孝文貞皇后林氏

孝文廢皇后馮氏 孝文幽皇后馮氏

孝文昭皇后高氏 宣武順皇后于氏

宣武皇后高氏 宣武靈皇后胡氏

孝明皇后胡氏 孝武皇后高氏

文帝文皇后乙弗氏 文帝悼皇后郁久闔氏

廢帝皇后宇文氏 恭帝皇后若干氏

孝靜皇后高氏

漢因秦制帝之祖母曰太皇太后母曰皇太后妃曰皇后餘則多稱夫人隨世增損非如周禮有夫人嬪婦御妻之數焉魏晉相因時有升降前史言之具矣魏氏王業之兆雖始於神元然自昭成之前未具言六宮之典而章平思昭穆惠煬烈八帝妃后無聞道武追尊祖妣皆從帝諡爲皇后始立中宮餘妾或稱夫人多少無限然皆有品次太武稍增左右昭儀及貴人椒房等後庭漸已多矣又魏故事將立皇后必令手鑄金人以成者爲吉不則不得立也又太武文成保母劬勞之恩並極尊崇之義雖事乖典禮而觀過知仁孝文改定內官左

右昭儀位視大司馬三夫人視三公三嬪視三卿六嬪
視六卿世婦視中大夫御女視元士後置女職以典內
司視尙書令僕作司大監女侍中三官視二品監女尙
書美人女史女賢人女書史書女小書女五官視三品
中才人供人中使女生才人恭使宮人視四品青衣女
酒女饗女食奚官女奴視五品及齊神武文襄俱未踐
尊極神武嫡妻稱妃其所媵茹茹女稱爲茹茹公主文
襄旣尙魏朝公主故無別號兩宮自餘姬侍並稱娘而
已文宣後庭雖有夫人嬪御之稱然未具員數孝昭內
職甚少唯楊嬪才貌兼美復是貴家襄城王母桑氏有

德行並蒙恩禮其餘無聞焉河清新令內命婦依古制
有三夫人九嬪二十七世婦八十一御女又準漢制置
昭儀有左右二人比丞相其弘德正德崇德爲三夫人
比三公光猷昭訓隆徽爲上嬪比三卿宣徽凝暉宣明
順華凝華光訓爲下嬪比六卿正華令則修訓曜儀明
淑芳華敬婉昭華光正昭寧貞範弘徽和德弘猷茂光
明信靜訓曜德廣訓暉範敬訓芳猷婉華明範豔儀暉
則敬信爲二十七世婦比從三品穆光茂德貞懿曜光
貞凝光範令儀內範穆閨婉德明婉艷婉妙範暉章敬
茂靜肅瓊章穆華慎儀妙儀明懿崇明麗則婉儀彭媛

修閑修靜弘慎豔光漪容徽淑秀儀芳婉貞慎明豔真
穆修範肅容茂儀英淑弘豔正信凝婉英範懷順修媛
良則瑤章訓成潤儀寧訓淑懿柔則穆儀修禮昭慎貞
媛肅閨敬順柔華昭順敬寧明訓弘儀崇敬修敬承閑
昭容麗儀閑華思柔媛光懷德良媛淑猗茂範良信豔
華徽娥肅儀妙則爲八十一御女比正四品武成好內
並具其員自外又置才人采女以爲散號後主旣立二
后昭儀以下皆倍其數又置左右娥英比左右丞相降
昭儀比二大夫尋又置淑妃一人比相國周氏率由姬
制內職有序文帝創基修衽席以儉約武皇嗣歷節情

欲於矯枉宮闈有貫魚之美戚里無私溺之尤可謂得君人之體也宣皇外行其志內逞其欲溪壑難滿采擇無厭恩之所加莫限廝阜榮之所及無隔險設於是升蘭殿以正位踐椒庭而齊體者非一人焉階房帷而拖青紫緣恩倖而擁玉帛非一族焉雖辛癸之荒淫趙李之傾惑曾未足比其髣髴也人厭苛政弊事實多文帝之祀忽諸特由於此隋文思革前弊大矯其違唯皇后當室傍無私寵婦官位號未詳備焉開皇二年著內官之式略依周禮省減其數嬪三員掌教四德視正三品世婦九員掌賓客祭祀視正五品女御三十八員掌女

功絲泉視正七品又采漢晉舊儀置六尙六司六典遞
相統攝以掌宮掖之政一曰尙宮掌導引皇后及閨閣
稟賜管司令三人掌圖籍法式糾察宣奏典琮三人掌
琮璽器玩二曰掌儀掌禮儀教學管司樂三人掌音律
之事典贊三人掌導引內外命婦朝見三曰尙服掌服
章寶藏管司飾三人掌簪珥花嚴典櫛三人掌巾櫛膏
沐四曰尙食掌進饌先嘗管司醫三人掌方藥卜筮典
器三人掌罇彝器皿五曰尙寢掌帷帳牀褥管司筵三
人掌鋪設灑掃典執三人掌扇傘燈燭六曰尙工掌營
造百役管司製三人掌衣服裁縫典會三人掌財帛出

入六尚各三員視從九品六司視勲品六典視流外二品初文獻皇后功參歷試外預朝政內擅宮闈懷嫉妬之心虛嬪妾之位不設三妃防其上逼自嬪以下置六十員加又抑損服章降其品秩至文獻崩後始置貴人三員增嬪至九員世婦二十七員御女八十一員貴人等關掌宮闈之務六尚以下皆分隸焉煬帝時后妃嬪御無釐婦職唯端容麗飾陪從宴遊而已帝又參詳典故自製嘉名著之於令貴妃淑妃德妃是爲三夫人品正第一順儀順容順華修儀修容修華克儀克容克華是爲九嬪品正第二婕妤一十二員品正第三美人才

人一十五員品正第四是爲世婦寶林二十員品正第

五御女二十四員品正第六采女三十七員品正第七

是爲女御總一百二十以敘於寢又有承衣刀人皆

趨侍左右竝無員數視六品以下時又增置女官準尙

書省以六局管二十四司一曰尙宮局管司言掌宣傳

奏啓司簿掌名錄計度司正掌格式推罰司闈掌門閣

管籥二曰尙儀局管司籍掌經史教學紙筆几案司樂

掌音律司賓掌賓客司贊掌禮儀贊相導引三曰尙服

局管司璽掌琮璽符節司衣掌衣服司飾掌湯沐巾櫛

玩弄司仗掌仗衛戎器四曰尙食局管司膳掌膳羞司

醞掌酒醴醢醢司藥掌醫巫藥劑司饎掌廩餼柴炭五
日尚寢局管司設掌牀席帷帳鋪設灑掃司輿掌輿輦
傘扇執持羽儀司苑掌園籩種植蔬菜瓜果司燈掌火
燭六日尚工局管司製掌營造裁縫司寶掌金玉珠璣
錢貨司綵掌繪帛司織掌織染六尚二十二司員各二
人唯司樂司膳員各四人每司又置典及掌以貳其職
六尚十人品從第五司二十八人六品從第六典二十八
人品從第七掌二十八人品從第九女史流外量局閑
劇多者十人以下無定員數聯事分職各有司存焉

魏神元皇后竇氏沒鹿回部大人賓之女也賓臨終誠

其二子速侯回題令善事帝及賓卒速侯等欲因帝會喪爲變語泄帝聞之晨起以佩刀殺后馳使告速侯等言后暴崩速侯等來赴因執殺之

文帝皇后封氏生桓穆二帝早崩桓帝立乃葬焉文成初穿天泉池獲一石銘稱桓帝葬母氏遠近赴會二十餘萬有司以聞命藏之太廟次妃蘭氏是生思帝

桓皇后惟氏生三子長曰普根次惠帝次煬帝平文崩后攝國事時人謂之曰女國后性猛忌平文之崩后所爲也

平文皇后王氏廣寧人也年十三因事入宮得幸於平

文生昭成帝平文崩昭成在襁褓時國有內難將害帝子后匿帝於袴中呪曰若天祚未終者汝無聲遂良久不啼得免於難昭成初欲定都於灑源川築城郭起宮室議不決后聞之曰國自上世遷徙爲業今事難之後基業未固若郭而居一旦寇來難卒遷動乃止烈帝之崩國祚殆危興復大業后之力也崩葬雲中金陵道武卽位配饗太廟

昭成皇后慕容氏慕容皝之女也初帝納皝妹爲妃未幾而崩皝後請繼好遣大人長孫秩逆后皝送于境上后至有寵生獻明帝及秦明王后性聰敏多智專父理

內每事多從初昭成遣衛辰兄悉勿祈還部落也后誠之曰汝還必深防衛辰辰姦猾終當滅汝悉勿祈死其子果爲衛辰所殺卒如后言建國二十三年崩道武卽位配饗太廟

獻明皇后賀氏東部大人野干女也少以容儀選入東宮生道武苻洛之內侮也后與道武及故臣吏避難北徙俄而高車來抄掠后乘車避賊而南中路失道乃仰天曰國家亂胄豈正爾絕滅也惟神靈扶助遂馳輪正不傾行百餘里至七箇山南而免難後劉顯使人將害帝帝姑爲顯弟亢湓妻知之密以告后梁眷亦來告難

后乃令帝去之后夜飲顯醉向晨故驚廐中羣馬使起視馬后泣謂曰吾諸子始皆在此今盡亡失汝等誰殺之故顯使不急追道武得至賀蘭部羣情未甚歸附后從弟外朝大人悅舉部隨從供奉盡禮顯怒將害后后奔亢泥家匿神車中三日亢泥舉室請救乃得免會劉顯部亂始得亡歸后后弟染干忌道武之得人心舉兵圍逼行宮后出謂染干曰汝等今安所置我而欲殺吾子也染干慙而去後后少子秦王觚使子燕慕容垂止之后以觚不反憂念寢疾皇始元年崩耐葬于盛樂金陵後追加尊諡配饗焉

道武皇后慕容氏寶之季女也中山平入克掖庭得幸左丞相衛王儀等奏請立皇后帝從儀令后鑄金人成乃立之封后母孟爲漂陽君後崩

道武宣穆皇后劉氏劉眷女也登國初納爲夫人生華陰公主後生明元后專理內事寵待有加以鑄金人不成故不登后位魏故事後宮產子將爲儲貳其母皆賜死道武末年后以舊法薨明元卽位追尊謚位配饗太廟自此後宮人爲帝母皆正配饗焉

明元昭哀皇后姚氏姚興女西平長公主也明元以后納之後爲夫人后以鑄金人不成未升尊位然帝寵禮

如后是後猶欲正位后謙不當泰常五年薨帝追恨之
贈皇后璽綬而加謚焉葬雲中金陵

明元密皇后杜氏魏郡鄴人陽平王超之妹也初以良
家子選入太子宫有寵生太武及明元卽位拜貴嬪泰
常五年薨謚曰貴嬪葬雲中金陵太武卽位追尊號謚
配饗太廟又立廟于鄴刺史四時薦祀以魏郡太后所
生之邑復其調役後甘露降于廟庭文成時相州刺史
高闔表修后廟詔曰婦人外成理無獨祀陰必配陽以
成天地未聞有莘之國立大姒之饗此乃先皇所立一
時之至感非經世之遠制便可罷祀先是太武保母竇

氏初以夫家坐事誅與二女俱入宮操行純備進退以禮明元命爲太武保母性仁慈帝感其恩訓奉養不異所生及卽位尊爲皇太后封其弟漏頭爲遼東王太后訓釐內外甚有聲稱性恬素寡欲喜怒不形於色好揚人之善隱人之過帝征涼州蠕蠕吳提入寇太后命諸將擊走之真君元年崩詔天下大臨三日太保盧魯元監護喪事謚曰惠葬崞山從后意也初后嘗登崞山顧謂左右曰吾母養帝躬敬神而愛人若死而不滅必不爲賤鬼然於先朝本無位次不可違禮以從園陵此山之上可以終託故葬焉別立后寢廟於崞山建碑頌德

太武皇后赫連氏屈丐女也太武平統萬納后及二妹俱爲貴人後立爲皇后文成初崩祔葬金陵

太武敬哀皇后賀氏代人也初爲夫人生景穆神麋元年薨追贈貴嬪葬雲中金陵後追號尊謚配饗太廟

景穆恭皇后郁久閭氏河東王毗妹也少以才選入東宮有寵生文成皇帝而薨文成卽位追尊號謚葬雲中金陵配饗太廟又文成乳母常氏本遼西人因事入宮乳帝有劬勞保護之功文成卽位尊爲保太后尋尊爲皇太后告於郊廟和平元年崩詔天下大臨三日謚曰昭葬於廣寧磨笄山俗謂之鳴鷄山太后遺志也依惠

太后故事別立寢廟置守陵二百家樹碑頌德

文成文明皇后馮氏長樂信都人也父朗秦雍二州刺史西城郡公母樂浪王氏后生於長安有神光之異朗坐事誅后遂入宮太武左昭儀后之姑也雅有母德撫養教訓年十四文成踐極以選爲貴人後立爲皇后文成崩故事國有大喪三日後御服器物一以燒焚百官及中宮皆號泣而臨之后悲叫自投火左右救之良久乃蘇獻文卽位尊爲皇太后丞相乙渾謀逆獻文年十二居于諒闇太后密定大策誅渾遂臨朝聽政及孝文生太后躬親撫養是後罷令不聽政事太后行不正內

寵李弈獻文因事誅之太后不得意遂害帝承明元年
尊曰太皇太后復臨朝聽政后性聰達自入宮掖粗學
書計及登尊極省決萬機孝文詔罷鷹師曹以其地爲
太后立報德佛寺太后與孝文遊于方山顧川阜有終
焉之志因謂羣臣曰舜葬蒼梧二妃不從豈必遠祔山
陵然後爲貴哉吾百歲後神其安此孝文乃詔有司營
建壽陵於方山又起永固石室將終爲清廟焉太和五
年起作八年而成刊石立碑頌太后功德太后以帝富
於春秋乃作勸戒歌三百餘章又作皇誥十八篇文多
不載太后立文宣王廟於長安又立思燕佛圖於龍城

皆刊石立碑太后又制內屬五廟之孫外戚六親總麻皆受復除性儉素不好華飾躬御縵繒而已宰人上膳案裁徑尺羞膳滋味減於故事十分之八太后嘗以體不安服菴闔子宰人昏而進粥有蠅蜒在焉后舉匕得之帝時侍側大怒將加極罰太后笑而釋之自太后臨朝專政孝文雅性孝謹不欲參決事無巨細一稟於太后太后多智猜忍能行大事殺戮賞罰決之俄頃多有不關帝者是以威福兼作震動內外故祀道德王遇張祐符承祖等拔自微闈歲中而至王公王叡出入臥內數年便爲宰輔賞賚千萬億計金書鐵券許以不死之

詔李冲以器能受任亦由見寵幃幄密加錫賚不可勝數后性嚴明假有寵待亦無所縱左右纖介之愆動加捶楚多至百餘少亦數十然性不宿憾尋亦待之如初或因此更加富貴是以人人懷於利欲至死而不思退太后曾與孝文幸靈泉池宴羣臣及蕃國使人諸方渠帥各令爲其方舞孝文上壽太后忻然作歌帝亦和歌遂命羣臣各言其志於是和歌者九十人太后外禮人望元丕游明根等頒賜金帛輿馬每至褒美叡等皆引丕參之以示無私又自以過失懼人議已小有疑忌便見誅戮迄后之崩孝文不知所生至如李訢李惠之徒

猜嫌覆滅者十餘家死者數百人率多枉濫天下寃之十四年崩於太和殿年四十九其日有雄雉集于太華殿帝酌飲不入口五日毀慕過禮諡曰文明太皇太后葬于永固陵日中而反虞於鑿立殿詔曰尊旨從儉不申罔極之痛稱情允禮仰損儉訓之德進退思惟倍用崩感又山陵之節亦有成命內則方丈外裁奄坎脫於孝子之心有所不盡者室中可二丈墳不得過三十步今以陵萬世所仰復廣爲六十步孤負遺旨益以痛絕其幽房大小棺槨質約不設明器至於素帳縵茵瓷瓦之物亦皆不置此則遵先志從冊令俱奉遺事而有從

有違未達者或以致怪梓宮之裏立堂之內聖靈所憑
已一一奉遵仰昭儉德其餘外事有所不從以盡痛慕
之情其宣示遠近著告羣司上明儉誨之美下彰違命
之失及卒哭孝文服衰近臣從服三司以下外臣衰服
者變服就練七品以下盡除卽吉設祔祭於太和殿公
卿以下始親公事帝毀瘠絕酒肉不御者三年初帝孝
於太后乃於永固陵東北里餘營壽宮遂有終焉瞻望
之志及遷洛陽乃自表瀍西以爲山園之所而方山虛
宮號曰萬年堂云

文成元皇后李氏梁國蒙縣人母頓丘王峻之妹也后

之生也有異於常父方叔恒言此女當大貴及長姿質
美麗太武南征永昌王仁出壽春軍至后宅因得后及
仁鎮長安遇事誅后與其家人送平城宮高祖登白樓
望見美之乃下臺后得幸於齊庫中遂有娠常太后後
問后知之持守庫者亦私書於壁記之別加驗問皆符
同及生獻文拜貴人太安二年太后令依故事令后具
條記在南兄弟及引所結宗兄洪之悉以付託臨訣每
一稱兄弟拊膺慟泣遂薨後謚曰元皇后葬金陵配饗

太廟

獻文思皇后李氏中山安喜人南郡王惠之女也姿德

婉淑年十八以選入東宮獻文卽位爲夫人生孝文帝
皇興三年薨葬金陵承明元年追崇號諡配饗太廟
孝文貞皇后林氏平原人也父勝位平涼太守叔父金
閭起自閹官獻文初爲定州刺史爲乙渾所誅及勝兄
弟皆死勝無子有二女入掖庭后容色美麗得幸於孝
文生皇子恂以恂將爲儲貳太和七年后依舊制薨帝
仁恕不欲襲前事而稟文明太后意故不果行諡曰貞
皇后葬金陵及恂以罪賜死有司奏追廢后爲庶人
孝文廢皇后馮氏太師熙之女也太和十七年孝文旣
終喪太尉元丕等表以長秋未建六宮無主請正內位

孝文從之立后爲皇后恩遇甚厚孝文後重引后姊昭儀至洛稍有寵后禮愛漸衰昭儀自以年長且前入宮掖素見待念輕后而不率妾禮后雖性不妬忌時有愧恨之色昭儀規爲內主譖構百端尋廢后爲庶人后貞謹有德操遂爲練行尼後終於瑤光佛寺

孝文幽皇后亦馮熙女母日常氏本賤微得幸於熙熙元妃公主薨後遂主家事生后與北平公夙文明太皇太后欲家世貴寵乃簡熙二女俱入掖庭時年十四其一早卒后有姿媚偏見愛幸未幾疾病太后乃遣還家爲尼帝猶留念焉歲餘而太后崩帝服終頗存訪之又

聞后素疹痊除遣闈官雙三念壘書勞問遂迎赴洛陽
及至寵愛過本初當夕宮人稀復進見拜爲左昭儀後
立爲皇后帝頻歲南征后遂與中官高菩薩私亂及帝
在汝南不豫后便公然醜恣中常侍雙蒙等爲其心腹
是時彭城公主宋王劉昶子婦也年少嫠居北平公馮
夙后之同母弟也后求婚於孝文孝文許之公主志不
願后欲強之婚有日矣公主密與侍婢及僮從十餘人
乘輕車冒霖雨赴懸瓠奉謁孝文自陳本意因言后與
菩薩亂狀帝聞因駭愕未之信而祕匿之此後后漸憂
懼與母常氏求託女巫禱厭孝文疾不起一旦得如文

明太后輔少主稱命者賞報不貲又取三牲宮中祆祠假言祈福專爲左道母常或自詣宮中或遣侍婢與相報答帝至洛執問菩薩雙蒙等具得情狀帝以疾臥含溫室夜引后并列菩薩等於戶外后臨入令搜衣中稱有寸刃便斬后頓首泣謝乃賜坐東楹去御筵二丈餘孝文令菩薩等陳狀又讓后曰汝有祆術可具言之后乞屏左右有所密狀孝文勅中常侍悉出唯令長秋卿白整在側取衛直刀拄之后猶不言孝文乃以綿堅塞整耳自小語再三呼整無所應乃令后言事隱人莫知之高祖乃喚彭城北海二王令入坐言昔是汝嫂今便

他人但入勿避又曰此老嫗欲白刃插我肋上可窮問本末勿有所難又云馮家女不能復相廢逐且使在宮中空坐有心乃能自死汝等勿謂吾猶有情也帝素至孝猶以文明太后故未行廢二王出乃賜后辭死訣再拜稽首涕泣及入宮後帝命中官有問於后后罵曰我天子婦當面對豈令汝傳也帝怒敕后母常入示與后狀常撻之百餘乃止帝尋南伐后留京師雖以罪失寵而夫人嬪妾奉之如法唯令世宗在東宮無朝謁之事帝疾甚謂彭城王勰曰後宮久乖陰德自絕於天吾死後可賜自盡別宮葬以后禮庶掩馮門之大過帝崩梓

宮達魯陽乃行遺詔北海王詳奉宣遺旨長秋卿白整等入授后藥后走呼不肯引決曰官豈有此也是此諸王輩殺我耳整等執持強之乃含椒而盡梓宮次洛南咸陽王禧等知審死相視曰若無遺詔我兄弟亦當作計去之豈可令失行婦人宰制天下殺我輩也諡曰幽皇后葬長陵塋內

孝文文昭皇后高氏司徒公肇之妹也父颺母蓋氏凡四男三女皆生於東裔孝文初乃舉室西歸近龍城鎮鎮表后德色婉豔及至文明太后親幸北部曹見后奇之入掖庭時年十三初后幼曾夢在堂內立而日光自

窻中照之灼灼而熱后東西避之光猶斜照不已如是數夕怪之以白其父颺颺以問遼東人閔宗宗曰此奇徵也昔有夢月入懷猶生天子況日照之徵此女將被帝命誕育人君之象也後生宣武及廣平王懷樂安公主馮昭儀寵盛密有母養帝心后自代如洛陽暴薨於汲郡之共縣或云昭儀所賊也宣武之爲皇太子二日一朝幽后后拊念慈愛有加孝文出征宣武入朝必久留后宮親視櫛沐母道隆備其後有司奏請加號諡曰文昭貴人孝文從之宣武踐阼追尊配饗后先葬在長陵東南陵制卑局因就起山陵號終寧陵置邑戶五百

家明帝時更上尊號太后以同漢晉之典正姑婦之禮
廟號如舊文昭遷靈櫬於長陵北內西北六十步初開
終寧陵數丈於梓宮上獲大虵長丈餘黑色頭有王字
蟄而不動靈櫬既遷還置虵舊處

宣武順皇后于氏太尉烈弟勁之女也宣武始親政事
烈時爲領軍總心膂之任以嬪御未備左右諷諭稱后
有容德帝乃迎入爲貴人時年十四甚見寵愛立爲皇
后后靜默寬容性不妬忌生皇子三歲夭没其後暴崩
宮禁事祕莫能知悉而世議歸咎于高夫人葬永泰陵
諡曰順皇后

宣武皇后高氏文昭皇后弟偃之女也宣武納爲貴嬪
生皇子早夭又生建德公主後拜爲皇后甚見禮重性
妬忌宮人希得進御及明帝卽位上尊號曰皇太后尋
爲尼居瑤光寺非大節慶不入宮中建德公主始五六
歲靈太后出覲母武邑君時天文有變靈太后欲以當
禍是夜暴崩天下寃之喪還瑤光佛寺殯皆以尼禮初
孝文幽后之寵也欲專其愛後宮接御多見阻遏孝文
時言于近臣稱婦人妬防雖王者亦不能免況士庶乎
宣武高后悍忌嬪御有至帝崩不蒙侍接者由是在洛
二十餘年皇子全育者唯明帝而已

宣武靈皇后胡氏安定臨涇人司徒國珍女也母皇甫氏產后之日赤光四照京兆山北縣有趙胡者善於卜相國珍問之胡云賢女有大貴之表方爲天地母生勿過三人知也后姑爲尼頗能講宣武初入講禁中積歲諷左右后有姿行帝聞之乃召入掖庭爲充華世婦而椒庭之中以國舊制相與祈祝皆願生諸王公主不願生太子唯后每稱夫人等言何緣畏一身之死而令皇家不育冢嫡也明帝在孕同列猶以故事相恐勸爲諸計后固意確然幽夜獨誓但使所懷是男次第當長子子生身死不辭旣誕明帝進爲充華嬪先是宣武頻喪

皇子自以年長深加慎護爲擇乳保皆取良家宜子者
養於別宮皇后及克華皆莫得而撫視焉及明帝踐阼
尊后爲皇太妃後尊爲皇太后臨朝聽政猶曰殿下後
改令稱詔羣臣上書曰陛下自稱曰朕太后以明帝沖
幼未堪親祭欲傍周禮夫人與君交獻之義代行祭禮
禮官博議以爲不可而太后欲以幃幔自鄣觀三公行
事重問侍中崔光光便據漢和熹鄧后薦祭故事太后
大悅遂攝行初祀太后性聰悟多才藝姑旣爲尼幼相
依託略得佛經大義親覽萬機手筆斷決幸西林園法
流堂命侍臣射不能者罰之又自射針孔中之大悅賜

左右布帛有差先是太后勅造申訟車時御焉出自雲龍大司馬門從宮西北入自千秋門以納寃訟又親策孝秀州郡計吏於朝堂太后與明帝幸華林園宴羣臣于都亭曲水令王公以下賦七言詩太后詩曰化光造物含氣貞明帝詩曰恭已無爲賴慈英王公以下賜帛有差太后父薨百寮表請公除太后不許尋幸永寧寺觀建利於九級之基僧尼士女赴者數萬人及改葬文昭高后太后不欲令明帝主事乃自爲喪主出至終寧陵親奠遣事還哭於太極殿至於訖事皆自主焉後幸嵩高山夫人九嬪公主以下從者數百人升于頂中廢

諸淫祀而胡天神不在其例尋幸闕口溫水登鷄頭山
自射象牙簪一發中之勅示文武時太后逼幸清河王
懌姪亂肆情爲天下所惡領軍元叉長秋卿劉騰等奉
明帝於顯陽殿幽太后於北宮於禁中殺懌其後太后
從子都統僧敬與備身左右張車渠等數十人謀殺叉
復奉太后臨朝事不克僧敬坐徙邊車渠等死胡氏多
免黜後明帝朝太后於西林園宴文武侍臣飲至日夕
叉乃起至太后前自陳外云太后欲害已及騰太后答
云無此語遂至于極昏太后乃起執明帝手下堂言母
子不聚久今暮共一宿諸大臣送我入太后與帝向東

北小閣左衛將軍奚康生謀殺又不果自劉騰死又又寬怠太后與明帝及高陽王雍爲計解又領軍太后復臨朝大赦改元自是朝政踈緩威恩不立天下牧守所在貪憚鄭儼汙亂宮掖勢傾海內李神軌徐紇並見親侍一二年中位總禁要手握王爵輕重在心宣淫於朝爲四方之所穢文武解體所在亂逆土崩魚爛由於此矣僧敬又因聚集親族遂涕泣諫曰陛下母儀海內豈宜輕脫如此大怒自是不召僧敬內爲朋黨防蔽耳目明帝所親幸者太后多有事害焉有密多道人能胡語帝置於左右太后慮其傳致消息三月三日於城南大

巷中殺之方懸賞募賊又於禁中殺領左右鴻臚少卿
谷會紹達並帝所親也母子之間嫌隙屢起鄭儼慮禍
乃與太后計因潘嬪生女妄言皇子便大赦爲武泰元
年復陰行鳩毒其年二月明帝暴崩乃奉潘嬪女言太
子卽位經數日見人心已安始言潘嬪本實生女今宜
更擇嗣君遂立臨洮王子釗爲主年始二三歲天下愕
然及忝朱榮稱兵度河太后盡召明帝六宮皆令入道
太后亦自落髮榮遣騎拘送太后及幼主於河陰太后
對榮多所陳說榮拂衣而起太后及幼主並沉於河太
后妹馮翊君收瘞於雙靈寺武帝時始葬以后禮而追

加謚日靈

孝明皇后胡氏靈太后從兄冀州刺史盛之女靈太后欲榮重門族故立爲皇后明帝頗有酒德專嬖克華潘氏后及嬪御並無過寵太后爲帝選納抑屈人流時博陵崔孝芬范陽盧道約隴西李瓚等女俱爲世婦諸人訴訟咸見忿責武泰初后旣入道遂居於瑤光寺

孝武皇后高氏齊神武長女也帝見立乃納爲后及帝西幸關中降爲彭城王韶妃

文帝文皇后乙弗氏河南洛陽人也其先世爲吐谷渾渠帥居青海號青海王涼州平后之高祖莫瓌擁部落

入附拜定州刺史封西平公自莫瓌後三世尙公主女
乃多爲王妃甚見貴重父瑗儀同三司兗州刺史母淮
陽長公主孝文之第四女也后美容儀少言笑年數歲
父母異之指示諸親曰生女何妨也若此者實勝男年
十六文帝納爲妃及帝卽位以大統元年冊爲皇后后
性好節儉蔬食故衣珠玉羅綺絕於服玩又仁恕不爲
嫉妬之心帝益重之生男女十二人多早夭唯太子及
武都王戊存焉時新都關中務欲東討蠕蠕寇邊未遑
北伐故帝結婚以撫之於是更納悼后命后遜居別宮
出家爲尼悼后猶懷猜忌復徙后居秦州依子秦州刺

史武都王帝雖限大計恩好不忘後密令養髮有追還之意然事祕禁外無知者六年春蠕蠕舉國度河前驅已過夏頗有言虜爲悼后之故與此役帝曰豈有百萬之衆爲一女子舉也雖然致此物論朕亦何顏以見將帥邪乃遣中常侍曹寵齋手勅令后自盡后奉勅揮淚謂寵曰願至尊享千萬歲天下康寧死無恨也因命武都王前與之決遺語皇太子辭皆悽愴因慟哭久之侍御咸垂涕失聲莫能仰視召僧設供令侍婢數十人出家手爲落髮事畢乃入室引被自覆而崩年三十一鑿麥積崖爲龕而葬神柩將入有二叢雲先入龕中頃之

一滅一出後號寂陵及文帝山陵畢手書云萬歲後欲令后配饗公卿乃議追諡曰文皇后祔於太廟廢帝時合葬於永陵

文帝悼皇后郁久閭氏蠕蠕主阿那瓌之長女也容貌端嚴夙有成智大統初蠕蠕屢犯北邊文帝乃與約通好結婚扶風王孚受使奉迎蠕蠕俗以東爲貴后之來營幕戶席一皆東向車七百乘馬萬疋馳千頭到黑鹽池魏朝鹵簿文物始至孚奏請正南面后曰我見魏主故蠕蠕女也魏仗向南我自東面孚無以辭四年正月至京師立爲皇后時年十四六年後懷孕將產居於瑤

華殿間上有狗吠聲心甚惡之又見婦人盛飾來至后所后謂左右此爲何人醫巫傍侍悉無見者時以爲文后之靈產訖而崩年十六葬於少陵原十七年合葬永陵當會橫橋北后梓宮先至鹿苑帝輶輦後來將就次所軌折不進

廢帝皇后宇文氏周文帝女也后初產之日有雲氣滿室芬氲久之幼有風神好陳列女圖置之左右周文曰每見此女良慰人意廢帝之爲太子納爲妃及卽位立爲皇后志操明秀帝深重之專寵後宮不置嬪御帝旣廢崩后亦以忠於魏室罹禍

恭帝皇后若干氏司空長樂正公惠之女也有容色恭
帝納之爲妃及卽位立爲皇后後出家爲尼在佛寺薨
竟無諡

孝靜皇后高氏齊神武之第二女也天平四年詔娉以
爲皇后神武前後固辭帝不許興和初詔司徒孫騰司
空襄城王昶等奉詔致禮以後駕迎於晉陽之丞相第
五月立爲皇后大赦齊受禪降爲中山王妃後降于尙
書左僕射楊遵彥

北史卷十三

北史卷十三考證

后妃傳敘以典內司視尚書令僕○以典內司魏書作
以典內事內司

作司大監女侍中三官視二品○官監本訛宮今改從
南本

桓皇后惟氏傳○惟魏書作祁

平文皇后王氏傳將害帝子○帝魏書作皇

昭成皇后慕容氏傳后性聰敏多智專夕理內○專夕

理內魏書作專理內事

獻明皇后賀氏傳中路失道○道魏書作轄

道武皇后慕容氏傳帝從儀令后鑄金人成乃立之○
儀魏書作羣臣議

明元昭哀皇后姚氏傳明元以后納之○后字下魏書
有禮字

文成元皇后李氏傳持守庫者亦私書於壁記之○持
魏書作時應改從之

孝文幽皇后傳及至寵愛過本初○魏書無本字
帝怒敕后母常入○敕監本訛刺今改從魏書

宣武皇后高氏傳文昭皇后弟偃之女也○偃監本訛
優今改從魏書

宣武靈皇后胡氏傳賢女有大貴之表方爲天地母生
勿過三人知也○生字下魏書有天地主三字今脫
去

后姑爲尼頗能講宣武初入講禁中○頗能講下魏書
有道字今脫去

孝靜皇后高氏傳興和初詔司徒孫騰司空襄城王昶
等奉詔致禮○昶一本作旭

北史卷十三考證

北史卷十四

唐

李

延

壽

撰

列傳第二

后妃下

齊武明皇后婁氏

蠕蠕公主郁久閭氏

彭城太妃朱氏

小朱氏

上黨太妃韓氏

馮翊太妃鄭氏

高陽太妃游氏

馮娘李娘

文襄敬皇后元氏

琅邪公主

文宣皇后李氏

段昭儀王嬪

薛嬪

孝昭皇后元氏

武成皇后胡氏

弘德李夫人

後主皇后斛律氏

後主皇后胡氏

後主皇后穆氏

馮淑妃

周文皇后元氏

文宣皇后叱奴氏

孝閔皇后元氏

明敬皇后獨孤氏

武成皇后阿史那氏

武皇后李氏

宣皇后楊氏

宣皇后朱氏

宣皇后陳氏

宣皇后元氏

宣皇后尉遲氏

靜皇后司馬氏

隋文獻皇后獨孤氏

宣華夫人陳氏

容華夫人蔡氏

煬愍皇后蕭氏

齊武明皇后婁氏諱昭君贈司徒內干之女也少明悟強族多聘之並不肯行及見神武城上執役驚曰此真吾夫也乃使婢通意又數致私財使以媵已父母不得已而許焉神武既有澄清之志傾產以結英豪密謀祕策后恒參預及拜勃海王妃闔闈之事悉決焉后高明嚴斷雅遵儉約往來外舍侍從不過十人性寬厚不妬忌神武姬侍咸加恩待神武嘗將西討出師后夜夔生一男一女左右以危急請追告神武后弗聽曰王出統大兵何得以我故輕離軍幕死生命也來復何爲神武聞之嗟嘆良久沙苑敗後侯景屢言請精騎二萬必能

取之神武悅以告于后后曰若如其言豈有還理得獺
失景亦有何利乃止神武逼於蠕蠕欲娶其女而未決
后曰國家大計願不疑也及茹茹公主至后避正室處
之神武愧而拜謝焉曰彼將有覺願絕勿顧慈愛諸子
不異已出躬自紡績人賜一袍一袴手縫戎服以帥左
右弟昭以功名自達其餘親屬未嘗爲請爵位每言有
材當用義不以私亂公文襄嗣位進爲太妃文宣將受
魏禪后固執不許帝所以中止天保初尊爲皇太后宮
曰宣訓濟南卽位尊爲太皇太后尚書令楊愔等受遺
詔輔政疎忌諸王太皇太后密與孝昭及諸大將定策

誅之下令廢立孝昭卽位復爲皇太后孝昭崩太后又下詔立武成帝大寧二年春太后寢疾衣忽自舉用巫媪言改姓石氏四月辛丑崩於北宮時年六十二五月甲申合葬義平陵太后凡孕六男二女皆感夢孕文襄則夢一斷龍孕文宣則夢大龍首尾屬天地張口動目勢狀驚人孕孝昭則夢蠕龍於地孕武成則夢龍浴於海孕魏二后並夢月入懷孕襄城博陵二王夢鼠入衣下后未崩有童謠曰九龍母死不作孝及后崩武成不改服緋袍如故未幾登三臺置酒作樂宮女進白袍帝怒投諸臺下和士開請止樂帝大怒擲之帝於昆季次

寔九蓋其徵驗也

蠕蠕公主者蠕蠕主郁久閭阿那瓌女也蠕蠕強盛與西魏通和欲連兵東伐神武病之令杜弼使蠕蠕爲世子求婚阿那瓌曰高王自娶則可神武猶豫尉景與武明皇后及文襄並勸請乃從之武定三年使慕容儼往媾之號曰蠕蠕公主八月神武迎於下館阿那瓌使其弟秃突佳來送女且報聘仍戒曰待見外孫然後返國公主性嚴毅一生不肯華言神武嘗有病不得往公主所秃突佳怨恚神武自射堂輿疾就公主其見將護如此神武崩文襄從蠕蠕國法蒸公主產一女焉

彭城太妃亦朱氏榮之女魏孝莊后也神武納爲別室
敬重踰於婁妃見必束帶自稱下官神武迎蠕蠕公主
還亦朱氏迎於木井北與蠕蠕公主前後別行不相見
公主引角弓仰射翔鴟應弦而落妃引長弓斜射飛鳥
亦一發而中神武喜曰我此二婦並堪擊賊後爲尼神
武爲起佛寺天保初爲太妃及文宣狂酒將無禮於太
妃太妃不從遂遇禍小爾朱者兆之女也初爲建明皇
后神武納之生任城王未幾與趙郡公琛私通徙於靈
州後適范陽盧景璋

上黨太妃韓氏軌之妹也神武微時欲媾之軌母不許

及神武貴韓氏夫已死乃納之

馮翊太妃鄭氏名大車嚴祖妹也初爲魏廣平王妃遷
鄴後神武納之寵冠後庭生馮翊王潤神武之征劉蠡
升文襄蒸於大車神武還一婢告之二婢爲證神武杖
文襄一百而幽之武明后亦見隔絕時彭城亦朱太妃
有寵生王子湫神武將有廢立意文襄求救於司馬子
如子如來朝僞爲不知者請武明后神武告其故子如
曰消難亦姦子如妾如此事正可覆蓋妃是王結髮婦
常以父母家財奉王王在懷朔被杖背無完皮妃晝夜
供給看瘡後避葛賊同走并州貧困然馬屎自作靴恩

義何可忘夫婦相宜女配至尊男承大業又婁領軍勳
何宜搖動一女子如草芥況婢言不必信神武因使子
如鞠之子如見文襄尤之曰男兒何意畏威自誣因告
二婢反辭脇告者自縊乃啓神武曰果虛言神武大悅
召后及文襄武明后遙見神武一步一叩頭文襄且拜
且進父子夫妻相泣乃如初神武乃置酒曰全我父子
者司馬子如賜之黃金百三十斤文襄贈良馬五十疋
高陽太妃游氏父京之爲相州長史神武尅鄴欲納之
京之不許遂牽曳取之京之尋死游氏於諸太妃中最
有德訓諸王公主婚嫁常令主之焉娘者子昂妹也初

爲魏任城王妃適忝朱世隆神武納之生浮陽公主李
娘者廷寔從妹也初爲魏城陽王妃又王娘生永安王
浚穆娘生陽平王淹並早卒不爲太妃

文襄敬皇后元氏魏孝靜帝之妹也孝武帝時封馮翊
公主而歸於文襄容德兼美曲盡和敬初生河間王孝
琬時文襄爲世子三日而孝靜幸世子第贈錦綵及布
帛萬匹世子辭求通受諸貴禮遺於是十屋皆滿次生
兩公主文宣受禪尊爲文襄皇后居靜德宮及天保六
年文宣漸致昏狂乃移居於高陽之宅而取其府庫曰
吾兄昔姦我婦我今須報乃淫於后其高氏女婦無親

疏皆使左右亂交之於前以葛爲絙令魏安德主騎上
使人推引之又命胡人苦辱之帝又自呈露以示羣下
武平中后崩耐葬義平陵琅邪公主名玉儀魏高陽王
斌庶生妹也初不見齒爲孫騰妓騰又放棄文襄遇諸
途悅而納之遂被殊寵奏魏帝封焉文襄謂崔季舒曰
爾由來爲我求色不如我自得一絕異者崔暹必當造
直諫我亦有以待之及暹諮事文襄不復假以顏色居
三日暹懷刺墜之於前文襄問何用此爲暹悚然曰未
得通公主文襄大悅把暹臂入見焉季舒語人曰崔暹
常忿吾佞在大將軍前每言叔父合殺及其自作體佞

乃體過於吾玉儀同產姊靜儀先適黃門郎崔括文襄亦幸之皆封公主括父子由是超授賞賜甚厚焉

文宣皇后李氏諱祖娥趙郡李希宗女也容德甚美初爲太原公夫人及帝將建中宮高隆之高德正言漢婦人不可爲天下母宜更擇美配楊愔固請依漢魏故事不改元妃而德正猶固請廢后而立段昭儀欲以結勲貴之援帝竟不從而立后焉帝好捶撻嬪御乃至有殺戮者唯后獨蒙禮敬天保十年改爲可賀敦皇后孝昭卽位降居昭信宮號昭信皇后武成踐阼逼后淫亂云若不許我當殺爾兒后懼從之後有娠太原王紹德至

閤不得見愠曰兒豈不知邪姊姊腹大故不見兒后聞之大慙由是生女不舉帝橫刀詬曰爾殺我女我何不殺爾兒對后前築殺紹德后大哭帝愈怒裸后亂搥撻之號天不已盛以絹囊流血淋漓投諸渠水良久乃蘇犢車載送妙勝尼寺后性愛佛法因此爲尼齊亡入關隋時得還趙郡段昭儀韶妹也婚夕韶妻元氏爲俗弄女婿法戲文宣文宣銜之後因發怒謂韶曰我會殺爾婦元氏懼匿婁太后家終文宣世不敢出昭儀才色兼美禮遇殆同正嫡後主時改適錄尚書唐邕王嬪者琅邪人也嬪姊先適崔修文宣並幸之數數降其夫家超

用修爲尚書郎薛嬪者本倡家女也年十四五時爲清河王岳所好其父求內宮中大被嬖寵其姊亦俱進御文宣後知先與岳通又爲其父乞司徒公帝大怒先鋸殺其姊薛嬪當時有娠過產亦從戮

孝昭皇后元氏開府元蠻女也初爲常山王妃天保末賜姓步六孤孝昭卽位立爲皇后帝崩從梓宮之鄴始度汾橋武成聞后有奇藥追索之不得使闈人就車頓辱降居順成宮武成旣殺樂陵王元被闈隔不得與家相知宮闈內忽有飛語帝令檢推得后父兄書信元蠻由是坐免官后以齊亡入周氏宮中隋文帝作相放還

山東

武成皇后胡氏安定胡延之女其母范陽盧道約女初懷孕有胡僧詣門曰此宅瓠蘆中有月旣而生后天保初選爲長廣王妃產後主日有鴉鳴於產帳上武成崩尊爲皇太后陸媼及和士開密謀殺趙郡王叡出婁定遠高文遙爲刺史和陸諂事太后無所不至初武成時后與諸闖人襄狎武成寵幸和士開每與后握槩因此與后姦通自武成崩後數出詣佛寺又與沙門曇獻通布金錢於獻席下又挂寶裝胡牀於獻屋壁武成平生之所御也乃置百僧於內殿託以聽講日夜與曇獻寢

處以獻爲昭玄統僧徒遙指太后以弄曇獻乃至謂之
爲太上者帝聞太后不謹而未之信後朝太后見二少
尼悅而名之乃男子也於是曇獻事亦發皆伏法并殺
元山王三郡君皆太后之所昵也帝自晉陽奉太后還
鄴至紫陌卒遇大風兼舍人魏僧伽明風角奏言卽時
當有暴逆事帝詳云鄴中有急彎弓纏朔馳入南城合
鄧長顯幽太后北宮仍有勅內外諸親一不得與太后
相見久之帝迎復太后太后初聞使者至大驚慮有不
測每太后設食帝亦不敢嘗周使元偉來聘作述行賦
敘鄭莊公剋段而遷姜氏文雖不工當時深以爲愧齊

亡入周恣行姦穢開皇中殂

弘德夫人李氏趙郡李叔讓女也初爲魏靜帝嬪武成納焉生南陽王仁盛爲太妃姊爲南安王思妃坐夫反以燒死太妃聞之發狂而薨文宣王嬪及中人盧勒又妹武成竝以爲嬪武成崩後胡后令二嬪自殺二嬪悲哭後主爲之惻愴私遺衣物令出外避焉盧養淮南王後爲太妃又有馬嬪亦得幸爲后所妬自縊死彭樂任祥竝有女因坐父兄事皆入宮爲文宣所幸武成以彭爲夫人養齊安王任生丹陽王竝爲太妃

後主皇后斛律氏左丞相光之女也初爲皇太子妃後

主受禪立爲皇后武平三年正月生女帝欲悅光詐稱生男爲之大赦光誅后廢在別宮後令爲尼齊滅嫁爲開府元仁妻

後主皇后胡氏隴東王長仁女也胡太后失母儀之道深以爲愧欲求悅後主故飾后於宮中令帝見之帝果悅立爲弘德夫人進左昭儀大被寵愛斛律后廢陸媼欲以穆夫人代之太后不許祖孝徵請立胡昭儀遂登爲皇后陸媼旣非勸立又意在穆夫人其後於太后前作色而言曰何物親姪女作如此語言太后問有何言曰不可道固問之乃曰語大家云太后行多非法不可

以訓太后大怒喚后出立剃其髮送合還家帝思之每致詩以通意後與斛律廢后俱召入內數日而鄴不守后亦改嫁云

後主皇后穆氏名邪利本斛律后從婢也母名輕霄本穆子倫婢也轉入侍中宋欽道家姦私而生后莫知氏族或云后即欽道女子也小字黃花後字舍利欽道婦妬輕霄面黥爲宋字欽道伏誅黃花因此入宮有幸於後主宮內稱爲舍利太監女侍中陸大姬知其寵養以爲女薦爲弘德夫人武平元年六月生皇子恒於時後主未有儲嗣陸陰結待以監撫之任不可無主時皇后

斛律氏丞相光之女也慮其懷恨先令母養之立爲皇太子陸以國姓之重穆陸相對又奏賜姓穆氏胡庶人之廢也陸有助焉故遂立爲皇后大赦初有折衝將軍元正烈於鄴城東水中得璽以獻文曰天皇后璽蓋石氏所作詔書頒告以爲穆后之瑞焉武成爲胡后造真珠裙袴所費不可稱計被火燒後主旣立穆皇后復爲營之屬周武遭太后喪詔侍中薛孤康買等爲弔使又遣商胡齋錦綵三萬疋與弔使同往欲市真珠爲皇后造七寶車周人不與交易然而竟造焉先是童謠曰黃花勢欲落清觴滿盃酌言黃花不久也後主自立穆后

以後昏飲無度故云清觴滿杯酌陸息駱提婆詔改姓
爲穆陸大姬皆以皇后故也后旣以陸爲母提婆爲家
更不採輕霄輕霄後自療面欲求見爲大姬陸媼使禁
掌之竟不得見

馮淑妃名小憐大穆后從婢也穆后愛衰以五月五日
進之號曰續命慧黠能彈琵琶工歌舞後主惑之坐則
同席出則並馬願得生死一處命淑妃處隆基堂淑妃
惡曹昭儀所常居也悉令反換其地周師之取平陽帝
獵於三堆晉州亟告急帝將還淑妃請更殺一圍帝從
其言識者以爲後主名緯殺圍言非吉徵及帝至晉州

城已欲沒矣作地道攻之城陷十餘步將士乘勢欲入
帝勅且止召淑妃共觀之淑妃粧點不獲時至周人以
木拒塞城遂不下舊俗相傳晉州城西石上有聖人跡
淑妃欲往觀之帝恐弩矢及橋故抽攻城木造遠橋監
作舍人以不速成受罰帝與淑妃度橋橋壞至夜乃還
稱妃有功勲將立爲左皇后卽令使馳取禕翟等皇后
服御仍與之並騎觀戰東偏少却淑妃怖曰軍敗矣帝
遂以淑妃奔還至洪洞戍淑妃方以粉鏡自玩後聲亂
唱賊至於是復走內參自晉陽以皇后衣至帝爲按轡
命淑妃著之然後去帝奔鄴太后後至帝不出迎淑妃

將至鑿城北門出十里迎之復以淑妃奔青州後主至
長安請周武帝乞淑妃帝曰朕視天下如脫屣一老嫗
豈與公惜也仍以賜之及帝遇害以淑妃賜代王達甚
嬖之淑妃彈琵琶因絃斷作詩曰雖蒙今日寵猶憶昔
時憐欲知心斷絕應看膠上弦達妃爲淑妃所譖幾致
於死隋文帝將賜達妃兄李詢令著布裙配春詢母逼
令自殺後主以李祖欽女爲左昭儀進爲左娥英裴氏
爲右娥英娥英者兼取舜妃娥皇女英名陽休之所制
樂人曹僧奴進二女大者忤旨剝面皮少者彈琵琶爲
昭儀以僧奴爲日南王僧奴死後又貴其兄弟妙達等

二人同日皆爲郡王爲昭儀別起隆基堂極爲綺麗陸媼誣以左道遂殺之又有董昭儀毛夫人彭夫人王夫人小玉夫人二李夫人皆嬖寵之毛能彈箏本和士開薦入帝所幸彭夫人亦音妓進死於晉陽造佛寺與總持相埒一李是隸戶女以五弦進一李卽孝貞之女也小玉生一男諸閹人在傍皆蒙賜給毛兄思安超登武衛董父賢義爲作軍主田昭儀闕亦超登開府其餘姻屬多至大官

周文皇后元氏魏孝武之妹也初封平原公主適開府張歡歡性貪殘遇后無禮帝殺歡改封后爲馮翊公主

以配周文帝生孝閔帝魏大統十七年薨恭帝三年十
二月合葬成陵孝閔踐阼追尊爲王后武成初又追尊
爲皇后

文宣皇后叱奴氏代人也周文帝爲丞相納爲姬生武
帝天和三年六月尊爲皇太后建德三年三月崩五月
葬永固陵

孝閔皇后元氏名胡摩魏文帝第五女也初封晉安公
主帝之爲略陽公也尚焉及踐阼立爲王后帝被廢后
出俗爲尼建德初武帝誅晉公護上帝尊號以后爲孝
閔皇后居崇義宮隋革命后出居里第大業十二年殂

明敬皇后獨孤氏太保衛公信之長女也帝之在藩納
爲夫人二年正月立爲王后四月崩葬昭陵武成初追
崇爲皇后明帝崩與后合葬焉

武成皇后阿史那氏突厥木杆可汗俟斤之女也突厥
滅蠕蠕後盡有塞表之地志陵中夏周文方與齊人爭
衡結以爲援俟斤初欲以女配帝旣而悔之武帝卽位
前後累遣使焉保定五年二月詔陳公純許公宇文貴
神武公竇毅南安公楊符等備皇后文物及行殿并六
宮以下一百二十人至俟斤牙所迎后俟斤又許齊婚
將有異志純等累請不得反命會雷風大起飄壞其穹

廬俟斤大懼以爲天譴乃禮送后純等奉之以歸天和三年三月至武帝接以親迎之禮后有姿貌善容止帝深敬禮焉宣帝卽位尊后爲皇太后大象元年二月改爲天元皇太后二年二月又尊曰天元上皇太后宣帝崩靜帝尊爲大帝太后隋開皇二年殂年三十二隋文詔有司備禮祔葬后於孝陵

武皇后李氏名娥姿楚人也于謹平江陵后家被籍沒至長安周文以后賜武帝後得親幸生宣帝宣政元年七月尊爲帝太后大象元年二月改爲天元帝太后七月又尊爲天皇太后二年二月尊爲天元聖皇太后宣

帝崩靜帝尊爲大帝太后隋開皇元年三月出俗爲尼改名常悲八年殂以尼禮葬于京城南

宣皇后楊氏名麗華隋文帝之長女也帝在東宮武帝爲帝納后爲皇太子妃宣政元年閏六月立爲皇后帝後自稱天元皇帝號后爲天元皇后尋又立天皇后及左右皇后與爲四皇后二年二月詔取象四星於是后及三皇后並加大焉冊授后爲天元大皇后又立天中大皇后與后爲五皇后焉后性柔婉不妬忌四皇后及嬪御等咸愛而仰之帝後昏暴滋甚喜怒乖度嘗譴后欲加之罪后進止詳閑辭色不撓帝大怒遂賜后死逼

令自引決后母獨孤氏聞之詣閤陳謝叩頭流血然後得免帝崩靜帝尊后爲皇太后居弘聖宮初宣帝不豫詔隋文帝入禁中侍疾及大漸劉昉鄭譯等因矯詔以隋文帝受遺輔政后初雖不豫謀然以嗣主幼沖恐權在他族不利於己聞昉譯已行此詔心甚悅後知隋文有異圖意頗不平及行禪代憤惋愈甚隋文內甚愧之開皇初封后爲樂平公主後又議奪其志后誓不許乃止大業五年從煬帝幸張掖殂於河西詔還京所司備禮祔葬后於定陵

宣帝后朱氏名滿月吳人也其家坐事没入東宮宣帝

之爲太子后被選掌衣服帝召幸之遂生靜帝大象元年四月立爲天元帝后七月改爲天皇后二年二月又改爲天大皇后后本非良家子又年長於帝十餘歲疎賤無寵以靜帝故特尊崇之班亞楊皇后焉宣帝崩靜帝尊后爲帝太后隋開皇元年二月出俗爲尼改名法淨六年殂以尼禮葬于京城西

宣帝后陳氏名月儀自云潁川人大將軍山提之第八女也大象元年六月以選入宮拜爲德妃月餘日立爲天左皇后二年二月改爲天左大皇后二月又詔以坤儀比德土數惟五四大皇后外增置天中大皇后一人

於是以后爲天中大皇后帝崩后出俗爲尼改名華光
后永徽初終父山提本亦朱兆之隸仕齊位特進開府
東兗州刺史謝陽王武帝平齊拜大將軍封淅陽公大
象元年以后父超授上柱國進鄆國公除大宗伯

宣帝皇后元氏名樂尚河南洛陽人開府晟之第二女
也年十五被選入宮拜貴妃大象元年七月立爲天右
皇后二年二月改爲天右大皇后帝崩后出家爲尼改
名華勝初后與陳皇后同時被選入宮俱拜爲妃及升
后又同日受冊帝寵遇二后禮數均等年齒復同特相
親愛及爲尼後李朱及尉遲后並相繼殞歿而二后貞

觀中尚存后父晟少以元氏宗室拜開府大象元年七月以后父進位上柱國封翼國公

宣帝皇后尉遲氏名繁熾蜀公迥之孫女也有美色初適杞公亮子西陽公溫以宗婦例入朝帝逼幸之及亮謀逆帝誅溫追后入宮拜長貴妃大象二年三月立爲天右大皇后帝崩后出俗爲尼改名華道隋開皇十五年殂

靜帝司馬皇后名令姬柱國滎陽公消難之女也大象元年二月宣帝傳位於帝七月爲帝納后爲皇后二年九月隋文帝以后父奔陳廢后爲庶人後嫁爲隋司州

刺史李丹妻貞觀初猶存

隋文獻皇后獨孤氏諱伽羅河南洛陽人周大司馬衛
公信之女也信見文帝有奇表故以后妻焉時年十四
帝與后相得誓無異生之子后姊爲周明帝后長女爲
周宣帝后貴戚之盛莫與爲比而后每謙卑自守及周
宣帝崩隋文居禁中總百揆后使李圓通謂文帝曰騎
獸之勢必不得下勉之及帝受禪立爲皇后突厥嘗與
中國交市有明珠一篋價直八百萬幽州總管陰壽白
后市之后曰當今戎狄屢寇將士罷勞未若以八百萬
分賞有功者百寮聞而畢賀文帝甚寵憚之帝每臨朝

后輒與上方輦而進至閣乃止使宮官伺帝政有所失
隨則匡諫多所弘益候帝退朝而同反宴寢相顧欣然
后早失二親常懷感慕見公卿有父母者每爲致禮馬
有司奏曰周禮百官之妻命於王后憲章在昔請依古
制后曰以婦人與政或從此漸不可開其源也不許后
每謂諸公主曰周家公主類無婦德失禮於舅姑離薄
人骨肉此不順事爾等當誡之后姑子都督崔長仁犯
法當斬文帝以后故免之后曰國家之事焉可顧私長
仁竟坐死異母弟隋以猫鬼巫蠱呪詛於后坐當死后
三日不食爲之請命曰隋若蠹政害民者不敢言今坐

爲妾身請其命。阨於是，減死一等。后雅性儉約，帝常合止利藥，須胡粉一兩，宮內不用，求之竟不得。又欲賜柱國劉嵩妻織成衣，領宮內亦無。上以后不好華麗，時齊七寶車及鏡臺絕巧麗，使毀車而以鏡臺賜后。后雅好讀書，識達今古。凡言事皆與上意合。宮中稱爲二聖。嘗夢周阿史那后言：「受罪辛苦，求營功德，明日言之。」上爲立寺追福焉。后兄女夫死於并州，后嫂以女有娠，請不赴葬。后曰：「婦人事夫，何容不往？其姑在宜。」自諮之，姑不許。女遂行，后頗仁愛。每聞大理決囚，未嘗不流涕。然性尤妬忌，後宮莫敢進御。尉遲迴女孫有美色，先在宮中。

帝於仁壽宮見而悅之因得幸后伺帝聽朝陰殺之上大怒單騎從苑中出不由徑路入山谷間三十餘里高頰楊素等追及扣馬諫帝太息曰吾貴爲天子不得自由高頰曰陛下豈以一婦人而輕天下帝意少解駐馬良久夜方還宮后候上於閣內及帝至流涕拜謝頰素等和解之上置酒極歡后自此意頰折初后以高頰是父之家客甚見親禮至是聞頰謂已爲一婦人因以銜恨又以頰夫人死其妾生男益不善之漸加譖毀帝亦每事唯后言是用后見諸王及朝士有妾孕者必勸帝斥之時皇太子多內寵妃元氏暴薨后意太子愛妾雲

氏害之由是諷帝黜高頰竟廢太子立晉王廣皆后之謀也仁壽二年八月甲子日暈四重巳巳太白犯軒轅其夜后崩於永安宮時年五十九葬於太陵其後宣華夫人陳氏容華夫人蔡氏俱有寵帝頗惑之由是發疾及危篤謂侍者曰使皇后在吾不及此云

宣華夫人陳氏陳宣帝女也性聰慧姿貌無雙及陳滅配掖庭後選入宮爲嬪時獨孤皇后性妬後宮罕得進御唯陳氏有寵煬帝之在藩也陰有奪宗之計規爲內助每致禮焉進金駝金蛇等物以取媚於陳氏皇太子廢立之際頗有力焉及文獻皇后崩進位爲貴人專房

擅寵主斷內事六宮莫與爲比及帝太漸遺詔拜爲宣
華夫人初帝寢疾於仁壽宮夫人與皇太子同侍疾平
旦更衣爲太子所逼夫人拒之得免歸於上所上怪其
神色有異問之夫人泣以實對帝恚曰畜生何堪付大
事獨孤誠誤我意謂獻皇后也因呼兵部尚書柳述皇
門侍郎元巖曰呼我兒述等呼太子帝曰舅也述巖出
閣爲勅書訖示左僕射楊素素以白太子太子遣張衡
入寢遂令夫人及後宮同侍疾者並就別室俄聞上崩
而未發喪也夫人與諸後宮相顧曰事變矣皆色動股
慄晡後太子遣使者齎金合帖紙於際親署封字以賜

夫人夫人見惶懼以爲鴆毒不敢發使者促之乃發見合中有同心結數枚諸宮人相謂曰得免死矣陳氏恚而却坐不肯致謝諸宮人共逼之乃拜使者其夜太子烝焉煬帝卽位出居仙都宮尋召入歲餘而終時年二十九帝深悼之爲製神傷賦

容華夫人蔡氏丹楊人也陳滅以選入宮爲世婦容儀婉孌帝甚悅之以文獻后故希得進幸后崩後漸見寵遇拜爲貴人參斷宮掖亞於陳氏帝寢疾加號容華夫人帝崩後亦爲煬帝所蒸

煬帝愍皇后蕭氏梁明帝歸之女也江南風俗二月生

子者不舉后以二月生由是季父岌收養之未幾岌夫
妻俱死轉養舅張軻家軻甚貧寔后躬親勞苦煬帝爲
晉王文帝爲選妃於梁卜諸女皆不吉歸乃迎后於舅
氏令使者占之曰吉遂冊爲妃后性婉順有智識好學
解屬文頗知占候文帝大善之煬帝甚寵敬焉及帝嗣
位立爲皇后帝每游幸未嘗不隨從時后見帝失德心
知不可不敢措言因爲述志賦以自寄焉其詞曰承積
善之餘慶備箕箒於皇庭恐脩名之不立將負累於先
靈迺夙夜而匪懈實夤懼於立冥雖自強而不息亮愚
蒙之多滯思竭節於天衢才追心而弗逮實庸薄之多

幸荷隆寵之嘉惠賴天高而地厚屬王道之升平均二儀之覆載與日月而齊明迺春生而夏長等品物而同榮願立志於恭儉私自兢於誠盈孰有念於知足苟無希於濫名惟至德之弘深情弗邇於聲色感懷舊之餘恩求故劔於宸極叨不世之殊眄謬非才而奉職何寵祿之踰分撫胸襟而未識雖沐浴於恩光內慙惶而累息顧微躬之寡昧思令淑之良難實不遑於啓處將有情而自安若臨深而履薄心戰慄其如寒夫居高而必危每處滿而防溢知恣夸之非道乃攝生於冲謐嗟寵辱之易驚尚無爲而抱一履謙光而守志且願安乎容

膝珠簾玉箔之奇金屋瑤臺之美雖時俗之崇麗蓋哲人之所鄙愧絺綌之不工豈絲竹而喧耳知道德之可尊明善惡之由已蕩囂煩之俗慮乃服膺於經史綜箴誠以訓心觀女圖而作軌遵古賢之令範冀福祿之能緩時循躬而三省覺今是而昨非嗤黃老之損思信爲善之可歸慕周姒之遺風美虞妃之聖則仰先哲之高才慕至人之休德質菲薄而難蹤心恬愉而去惑乃平生之耿介寔禮義之所遵雖生知之不敏庶積行以成仁懼達人之蓋寡謂何求而自陳誠素志之難寫同絕筆於獲麟及帝幸江都臣下離貳有宮人白后曰外聞

人人欲反后曰任汝奏之宮人言於帝帝大怒曰非汝
宜言乃斬之後宮人復白后曰宿衛者往往偶語謀反
后曰天下事一朝至此勢去已然無可救也何用言徒
令帝憂煩耳自是無復言者及宇文化及之亂隨軍至
聊城化及敗沒於竇建德建德妻曹氏妬悍煬帝妃嬪
美人並使出家并后置於武強縣是時突厥處羅可汗
方盛其可賀敦卽隋義城公主也遣使迎后建德不敢
留遂攜其孫正道及諸女入於虜庭大唐貞觀四年破
突厥皆以禮致之歸于京師賜宅於興道里二十一年
殂詔以皇后禮於揚州合葬於煬帝陵諡曰愍

論曰男女正位人倫大綱三代已還逮於漢晉何嘗不
敗於矯誣而興於聖淑至如后稷稟靈巨迹神元生自
天女克昌來葉異世同符魏諸后婦人之識無足論者
文明邪險幸不墜國靈后淫恣卒亡天下傾城之誠其
在茲乎乙后迫於畏逼有足傷矣昔鉤弋年少子幼漢
武所以行權魏世遂爲常制子貴而其母必死矯枉之
義不亦過乎孝文終革其失良有以也神武肇興齊業
武明追蹤周亂溫公之敗邦家馮妃比跡褒后然則汗
隆之義蓋有係焉其餘作孽爲責外平內蠹鑒之近代
於齊爲甚周氏粵自文皇逮乎宣帝年踰二紀世歷四

君業非草昧之辰事殊權宜之日乃棄同卽異以夷亂
華汨婚姻之彛序求豺狼之外利旣而報者倦矣施者
無厭向之所謂和親未幾已成讐敵奇正之道有異於
斯于時武皇雖受制於人未親庶政而謀士韞奇直臣
鉗口過矣哉而歷觀前載以外戚而居宰輔者多矣而
傾漢室者王族喪周家者楊氏何滅亡之禍若合契焉
隋文取鑒於已遠大革前失故母后之家不罹禍敗獨
孤權無呂霍獲全仁壽之前蕭氏勢異梁竇不傾大業
之後至或不隕舊基或更隆克構豈非處之以道其所
致然乎

北史卷十四

北史卷十四考證

齊武明皇后婁氏傳○齊一本作神

文襄敬皇后元氏傳玉儀同產姊靜儀○玉監本訛王
今改從南本

武成皇后胡氏傳彎弓纏稍馳入○稍一本作稍

後主皇后胡氏傳送令還家○送監本訛道今改從南
本

後主皇后穆氏傳屬周武遭太后喪○遭監本訛曹今
改從齊書

周文皇后元氏傳魏大統十七年○周書無十字

明敬皇后獨孤氏傳武成初追崇爲皇后○成監本訛
功今改從周書

武成皇后阿史那氏傳至俟斤牙所迎后○牙字下一
本有帳字

靜帝尊爲大帝太后○大帝一本作太皇

宣帝后陳氏傳月餘日立爲天左皇后○周書無日字
宣帝皇后元氏傳名樂尚○樂南本作藥

宣帝皇后尉遲氏傳名繁熾○周書名熾繁

隋文獻皇后獨孤氏傳時年五十九○隋書無九字

煬帝愍皇后蕭氏傳後宮人復白后曰○白監本訛曰

今改從隋書